





西齋集卷第六

詩七十三首

丙子丁丑  
在京師作

丙子正月十一日西厓編修席上



同用昌黎

醉贈張秘書韻

愛君官職冷人事百不聞  
愛君同巷住一日數見君  
近坊六七子結託于斯文  
性情淡若水心跡懶如雲  
問其平生交臭味投蘭芬  
人皆謂吾輩不與世俗羣  
夫豈尚幽獨實乃嗜好分  
敢矜萬人敵亦足成一軍  
新年踏燈市春動百草醺  
朱門酒肉氣九陌騰氛氲  
十載感盛舊事吾能云  
歡華等傳



舍逐此萬象紛五侯。相家零落春盤葷。當筵奏  
故伎碧草餘舞扇。富貴不滿眼如雨。消飛蚊豈似  
吾徒樂一笑。披南薰茫茫思故人。半成宿草墳何  
時歸去來。買田耦耕耘。試看文字外何物爲功勳。  
相期理書籤。庶不辜隙曛。

十三日寶君考功齋小飲同用東坡岐亭韻  
唐君不好飲所過設茗汁而余見杯杓流涎輒口  
濕飲伴只宮生相要兩相得下馬點銀瓶索此應  
最急多君出斗酒七箸佐鶩鴨愛我知我好飲噐  
潔布冪朱顏一笑紅滿座發頰赤不能持勸君酒

此人面白夕陽花氣亂。隱几墮冠幘。泠泠洛下詠  
唧唧瓶壘泣。還恐風月辜。不令新詩缺。嗟余固狂  
奴。卿輩自惡客。獨恨失宮生。匆匆趨內集。是日友  
鹿以家

宴離  
席去

同西厓再用前韻送王雄飛之陽山

才人豈長貧。老去逐米汁。苦辭冀北塵。不避海南  
濕。憶君菊花時。妙語欣未得。送君楊柳風。搖鞭去  
何急。行矣到江湖。畫闌看鬪鴨。放眼入山川。席帽  
無遮罽。野渚鱖魚肥。沙岸蘆芽赤。當壚無越女。夢  
想天下白。慎勿留三。顛倒從事憤。君念欲別情。



春風雜歌泣從茲樽一  
間但覺談笑缺及早謝書  
記仍作將軍客

雄飛向客于  
畢將軍家

煖老買燕玉生兒字

遙集

元夕同用樂天明月春風三五夜為韻分得  
春字

十年我作天街客當筵三賞元宵春流連風景美  
清夜舉酒酌月歌良辰昔年平津舊池館春盤春  
日羅芳辛兩牀絲管沸畫閣十丈璣瑜迴錦茵玉  
杯南國致竹葉翠釜北路求猩脣米家屏影蔣家  
燈歌舞由來動一旬何意風流後堂跡長衫零落

餘長身今年賃屋閑坊住三條小市依靈椿數君  
門巷靜如水詩酒冷淡時相親方當玉關事鼙鼓  
行人刀箭車鞞鞞東南不熟無笑聲罷燈想見五  
州民吾曹何事復歡宴奈此花月新年新六街到  
處競繁吹五陵門外殘香塵紅樓不數東華市看  
場還鬧城南闥

今燈市在城  
南靈佑觀旁

衣香月面互恍惚星

橋火樹交紛綸萬家歡笑忘萬事一洗天地無愁  
顰媿我短檠高二尺華燈壓倒光難伸何能置酒

邀重客惟當祭竈請比鄰精盤不羨豪家饌瓦盆  
聊送書生負論文合我十年交共感平生意氣真



堂前明月如過夢天上春風似舊人酒闌莫話歡  
華事半是當時東閣賓

題高江村所藏丁南羽洛神圖後四絕句

靈風夢雨認明璫空向微波漫品量誰寫閑情入  
秋水却疑鄴下舊丁郎

南岡北汜定誰真縹緲非煙若有神可惜風流畫  
羅襪陳王不共卷中人

紈扇屏風好體稱一門筆法自相承凋零漫論黃

初賦江左何從問馬澄陶隱居集載馬澄云右軍洛神賦諸書皆作今體

臨池拂紙玉堂閑大令神明已頓還不用千金傳

石室過江妙迹在人間江村正書全賦一通于圖末

送王文在同年之官鄴都

木蓮圖上看佳句曾夢東坡花樹間樂天東坡巴在忠州

子臺前蕃草細屈原碑下竹枝閑兩行小吏都如

鹿百磴州門半是山今日送君三峽去風流景物

一時還

送錢朗行同年之官茂名兼簡令貽

故人已罷東山吏君去仍尋舊綠莎花下相迎看

換印日邊重與話登科雲霄昔夢傷髭頷塵土勞

生事袴靴好浼弱翁煩問信為言豪氣總蹉跎



送錢石城之官洛陽六首

野草青青芍藥紅 帝鄉景物似江東  
共看才子花驄影 相伴春風入洛中

青山門巷數株斜 種植流傳十萬家  
吟過天津橋下路 春耕野老獻名花

履道池塘暮色開 永豐楊柳記誰栽  
滿城流水煙雲在 曾識風流耆舊來

春水花邊坐嘯天 綠莎廳冷印牀前  
文書緝取長鬚狀 破屋須防有玉川

公卿第宅有無間 十九名園斷碣閑  
盛跡恐成林

澗媿休教蕪沒在空山

縞帟練帔過紛綸 桃李飄零洛下春  
爲問明年領張徹 連天花月訪何人

湄亭詩二十八韻爲趙文饒作

江東春水生幽意 落野渚煙波有令姿  
風物淡可取 吾家婁江南 括括多散浦  
相望黃姑廟 喚渡雜田父 中有趙君宅  
清溪影修阻 野航恰兩三人家 只四五  
楊柳不知門 松竹各健舉 蕭疎簾箔間  
破屋過風雨 小亭牛宮西 亭制亞而古  
曲闌俯平隄 長共水雲語 寒碧上圖書  
綠淨延庭戶 池盡麥場



開間以花木補時過蓑笠影人跡清可數五年捨  
 家出徒步踏塵土自言老書生失脚陷機弩臨溪  
 別妻子束身入官府何殊忽作魚頃刻遊鼎俎恐  
 為溝中斷清濁難自吐鄉園三徑蕪泥塗混儕伍  
 淒涼相牛經零落種菊譜夢亦畏風波不敢思故  
 處老懷獨未忘此是吟嘯所依稀記流水連娟似  
 眉嫵殷勤遠行時寒葦霜月苦中夜間啼泣溪聲  
 有時怒魂歸白鶴村隱隱荒江樹何年商量灣破  
 袴弄柔櫓商量灣在嘉定一笑立滄洲終作雲溪  
 主

書崑山相國感蝗賦後二絕句

誰謂秋田螟蟻微西來煙陣助炎威何年故岸春  
 魚子也解漫天蔽日飛

食心豈復顧民艱蝨賊何曾遺草菅元老憂時仍  
 涕淚不因明主放還山東坡捕蝗詩云不願君  
 為孟浩然却遭明主放

山還

寄陶子師

四面煙波瘴色漫天南何事落風瀾人間不用方  
 頭客海外猶容強項官曉市騎牛孤島靜秋池剪  
 韭一家寒溪山自有南還興笑指當途瀧吏看



聞沈昭嗣辭監利令歸杭州

拂衣投劾下吳天謝病江山載鶴船陶令官纔八十日温公史續一千年

昭嗣熟精史學

東臯詩酒知無恙

陸渾風流可並傳教授閉門長奉母種花白日草

堂眠

秋夜讀白詩寄西厓八絕句

并序

余兩載來與西厓實君兩同年為友朋文酒之會談笑歡宴忽忽不自知樂也丙子四月送西厓之黔六月復送實君之越故人雲散塊馬獨處每當秋夕遶階微吟樂

天詩崔在吳興元在越出門騎馬覓何人之句遂爾黯然無寐因念古人膠漆之義或出處殊塗或天涯遠道而詩篇往復夢寐相尋多至數千百言未有過于元白者遂作八絕句寄西厓亦望西厓見而和之以郵致實君為他日會合佳話也

三人遊處一參差長夢花陰跋馬時楊柳萬條從此去竹枝聲裏出新詩

漏天半雨水煙秋相見坡前寂寞州料得風流舊心性滿身瘴色掉吟頭



才名李杜愁難並交分元劉訝許同新為樂天徵  
故事寫君詩作小屏風樂天在江州日寫微  
之小詩作詩屏風

誰當短李與迂辛詩酒楊木查重夏跡最親每話涪

翁夢天際黔州詩筆定如神宋人云山谷黔州  
以後句法尤奇

梅根治上棹船回清絕當年屈宋才萼菜吳中長

假滿楊枝好並過江來

堅約休官遞往還畫船相就五湖間瓊林花草思

前語夢罷吳山夢越山西厓每約他日為五湖煙  
水之遊越主吳賓遞相往

絕來不

翰林風月嗟無主吏部文章孰敢先光景文昌留

絕唱人間萬口定喧傳已下兼  
東實君

蓬島官居把酒來三條燭下舊徘徊煎茶小院追

遺事文字江山不放迴

醉歌贈畢將軍

淮南之豪真將種生小黃鬚萬夫勇長身結束兩

當衫快馬如龍獵荒茸自言十六願封侯登城殺

賊東南州四十 至尊親 召見射戟 特詔長

楊留前年北破花門將馬上移書開虎帳歸來偏

反無人知百戰功成不受賞今年 天子親臨邊

共許將軍致力年可憐官馬送還官行路蹉跎不



西齋集  
得前據鞍顧盼長髀肉但願天山破賊速萬里行  
空青海驄一箭射殺陰山鹿六石弓開霹靂聲雄  
心孤峭感平生丈夫老矣不如人何日還君白馬  
津嗟君棄置不世用僕姑生塵甲裂縫李陵臺暗  
黃沙月趙信城迷黑河夢小庭花影拂寒蕪窓下  
雲晴曠陣圖歎息當今文武才顏色慘淡無時無  
窮卷蕭閑射鵰手只許東鄰共持酒會看生擒贊  
普來相就吾家飲一斗

彭直上同年五十生子余爲誦東坡我亦從  
來識英物試教啼看定何如之句直上屬和

其韻

朝來賀客滿門閭爲看丹山老鳳雛盡送彭郎江  
上喜好傳蔡氏帳中書文章更望十年後湯餅先  
容一醉餘寄語風流在頭角愛憐應許似相如

消寒唱和詩十九首并序

丙子冬卧疾京師進不得與朝士大夫之  
列退又不能歸耕田里貧居僻左無以爲  
樂因結二三故舊爲九九消寒之會首於  
丙子十一月九日訖丁丑正月二十九日  
凡九會賓主十二人既而西溟從津門歸



夏重次也復來自江左遂益為十五人文

章相賞懽宴彌旬得詩凡十九首都為一

編以傳之同好焉時同會者慈溪姜宸英西溟嘉定孫致彌松坪

張雲章漢瞻海寧楊中訥崑木查慎行夏重楊守知次也海鹽俞兆曾大文錢塘王

丹林野航泰州官鴻歷友鹿江都史申義

宛平方辰拱樞常熟蔣廷錫揚孫及余共十五人

雪韭二十四韻

小市求嘉蔬薰蕕性殊別何為百草中羶葷氣相

涉逞味一葉秋入腹因人熱名登處士傳南史周顒傳春

初早花上少師帖楊少師凝式潘郎洛下居後圃

喜微霎潘岳閒居賦菜則葱韭蒜芋沈侯郊外宅寒畦帶雌霓

沈約郊居賦自古風雅人亦不廢采擷况乃宗廟

羞家祭春薦設閑把養老書鬲冷恣饕餮所以山

水間園官手日掇韭有山二種初冬土膏動拳蕨戴殘

雪東坡詩韭芽戴土如拳蕨溝東行兩三舍北科七八並戒日

中剪競向霜後拔就中貴黃苗蒙茸負筐篋京師尤重

韭巧滋梁肉腴碎點涼餅滑功豈等鍾乳唐本草拾遺韭

曰草價不高虎攝東風菜譜中名字鬪瑣屑嗟此

一物微而亦煩調燮吾聞雲臺戍野生沒馬埒金幼

戎北征錄雲臺戍多野韭沙葱出塞萬騎嘶不足供蹄齧空慚會



西齋集  
窮交堆盤翠重疊青袍互相映玉筋圓共摩臨城  
有故人美種不餉鮓采摘入詩卷佳味徒為說畿南  
非以臨城  
種為最佳

鴉二首限斜陽  
二字

招得疎林伴天邊作意斜閑疑城是畫寒就樹為  
家過影迷妝鬢啼聲雜塞笳黃塵爭一啄浪得小  
喧譁

雪滿甘寧廟風斜宋玉牆起常先曉色歸獨愛殘  
陽無食偏多子羣飛未著行亦知林下好極目野  
田荒

題狄向濤同年嘯亭

狄君風流生好事塵遺萬物有高致阮籍孫登那  
復聞嘯法不傳傳嘯意誅茅宋代趙家園人境蕭  
疎無俗喧登臨激越偶自寫胸中豪氣存蘇門清  
于鸞鳳入窅渺孤絕一聲蒼山鳥吳中詩石舊題  
名自愛茅亭鎮幽悄君乎狂醉神獨清作達何為  
多不平曼聲已矣落塵帽回頭笑看東方生西京  
雜記

東方生曼聲善  
嘯輒塵落帽

妝梅二十韻得尤  
字

玉鏡三生稱香臺一笑留折從蘇小墓買上綠珠



樓最惜傾城貌空憐絕代愁風情看並瘦襟韻肯  
終休取次朝雲鬢輕搔小鳳頭全身春窈窕滿面  
玉風流吹袖魂先斷飄衫霧未收額黃生有分頭  
白竟何由疎密誇微得橫斜問好不恐寒偏早試

玉溪生詩恐寒初欲試梅妝自愛却多羞已要旁人學還將侍

女尤鴛鴦名竊喜范成大梅譜有鴛鴦梅翡翠影相求元稹詩可

隣雙翡翠飛入小梅叢氣逼芙蓉帶光疑茉莉毬六銖衣黯

澹百葉髻溫柔何粉終誰辨韓香豈用偷十年愁

送老東坡詩十年花送佳人老一樹記曾遊圓鑿行長見同心

不易酬漢宮有同心梅天涯踪定定南國事悠悠平結黃

昏恨難銷風雨憂綠窗新拜月今夜夢揚州

舫船二首

柳花斜亞卷荷紅柳花盃卷荷俱酒盞名小席如波面面通

杜牧阻風當座上知章騎馬入杯中帆隨樺燭千

巡轉頭指銀瓶一棹空夜半酒兵休速去要令春

水笑曹公

誰采東坡藥玉規五年雲夢寫相思最憐寒雨飄

香候李義山詩雨送酒船香好稱清江病渴時拽盞郎君充

水手折花錄事作篙師自嗟酒戶年年減却似春

船上瀨遲



骰子二首和揚孫

花下斜拋宛轉紅更添新面看春風誰憐顏色迎

頭打苦恨人情入手空隨處未堪分黑白李翱五木經有

判生來偏只解玲瓏蹉跎選格君休笑一日依

稀到侍中唐房千里骰子選格以侍中為極貴

相思曾向碧油邊碧油堂印見皇甫崧骰子令消息頭盤付少

年漫謔金釵雙鬢落愛看玉骨一生圓迴環踪跡

元無定拋擲風流恨不全賴得中心有紅豆故應

終始得人憐

石球

雪花堆袖風旋面五都市上喧羣兒頑癡尚未解

人事凡百嬉戲靡不為鬪雞城東決勝負牽犬野

外長驅馳蟋蟀花瓠裏衣閉鶴鷄錦袋紅繩縻朝

塗絳采打羊骨暮射鬼箭縫牛皮已上皆都城冬日兒童之戲

一兒佻達弱好弄羣兒跳躍爭逐之天街無塵冰

地裂當門官道平于砥南山犖确石生卵蒼潤盤

骹圓凝脂兩眼睂盱手擲地高尻重足青衫垂一

丸疾去似流水一丸歷碌頻相追大呼逐丸如逐

賊囂然順走溝之湄明季石毬市語云順溝睥睨

共作烏牛時展轉却笑蠅娘遲嗟哉此風徧委巷



長雜廁溷沿藩籬吳鞋斜挑學齊市草靴小蹴圍  
 燕姬韓媽金彈鎮不收潘岳擲果知誰遺帽簷吹  
 側銀幡墮百籌百罰還不疲過頭萬事那可必石  
不中市語紛紛何共權銖錙脚底輸贏偶一中却  
 於斜直分雄雌君不見董君宅裏丸毛語蜀王宮  
 中花藥詞毬場春風生野草玉階寂歷無人知何  
 如羣兒一朝歡笑只跳蕩雙丸日月空參差我行  
 其旁三歎息采掇瑣事裁新詩

剔墨燈二首

月華如水浸樓臺誰乞東坡醉帖來何事翻成飛

白樣玉梅聲裏墨光開  
 煙波如夢一身閒燈火中流畫舫還最愛西湖好  
 風景黑雲堆墨小溪山

鼓燈二首

碧落連宵敞畫屏東風簫管不教停紅雲一朵星  
 橋路天上應無河鼓星  
 影燈百萬照儲胥誰見將軍樂事初好似彭城笳  
 鼓裏萬人歸擁醉尚書

鬪雞燈二首

金鳳飛來鷓鴣旋五花斜踏燭花偏橫拖錦綵雙



飛翼絕倒城東舊少年  
火色相爭似不平花冠金距鬪分明長鳴不夜雞  
人懶莫向深宮報六更

葡萄燈二首

梔子同心照座紅芙蓉小影玉池烘傳呼蠟燭天  
街靜各向春風出漢宮

曾將一斗遺長秋好掛春宵酒肆頭莫道熱中因  
富貴而今不許換涼州

花塲

玉河西去垂楊路寒煙半散清明雨高梁橋畔廣

塲開絳萼紅跗那能數自入朱門承顧盼戚里平  
陽後堂宴枉將顏色鬪尊前不知誰當春風選花  
奴白髮歎花枝花事興衰花夢變曾事當年田鄭  
家等閒慣識屏山面天厨新賜玉熙宮內人私索  
宜春院芍藥光中教豔歌牡丹枝下催宮扇永日  
笙歌閉曲闌天斜深色誰容見可憐零落畫堂東  
腰鼓初停滿砌紅傳令花奴領花去火養泥封土  
室中明年例近送花日依舊東風萬萬叢誰知花  
謝煙塵惡落葉無人掃東閣夜半池塘改綠陰玉  
鉤反掛鞦韆索廿載王侯甲第新進花猶是舊朝



人相逢今日畫樓主一笑仍關富貴身三月閑人  
遊白石踏春藉草紛行跡紅紅白白萬千花風流  
不減江南格香塵十隊小朱輪玉女霓裳裹巾幘  
金鞭隔袖數春枝軟語輕盈唾衣碧好花莫問落  
誰家如此風光真可惜惆悵雞頭池上館依稀王  
府街東宅探春無力丁香結愁處逢花花笑客人  
間萬事揔如花坐對花場空歎息

第三女晬日戲呈座客二首

江左吳郎寂莫家慰情只此伴天涯西窗雪意渾  
無賴醉寫新詩付小茶

元遺山自注唐人  
以茶為小女美稱

佳語空聞耳耳傳蔡家書卷謝家篇何如賀客皆  
龍虎收取當筵名士錢

題春帆梅信圖後十四韻送向濤歸溧陽

玉堂才子出金閨芳草江南路欲迷六幅蒲裁帆  
樣短一船書壓水痕低不因蓴菜求長假亟與梅  
花拂舊題西子淡妝浮斷岸吳王香水遶荒隄昔  
遊定訪孤山寺歸思先尋罨畫溪拽筵綠楊春市  
北施篙紅浪小橋西竹兜橫過煙三舍羅袖斜飄  
雨半犁詩牒冗殘同客命偏提寒儉遣人齋病閑  
漫稱金釵興買笑應爭玉樹栖側帽好看香案吏



作羹終憶太常妻秋時悼亡十年塵土經時合四面泉  
 聲入夢啼滿眼風光渾似海到頭官職賤于泥當  
 歸暫種誅山徑小草新成闢藥畦生處春風君不  
 負故人只是惜分携

題觀察陳公石湖圖三首

紫塞馳書識鳳麟十年風裁靜邊塵若教持入烏  
 蠻市應道中朝第一人公在諫垣曾出使絕塞

雲露新傳釀法工不教杯酒負東風北門遺愛西

川夢盡付人間緘口翁石湖集載雲露釀法張達夫酒尊名緘口翁

拂袖歸來入畫圖吳山越舫映菰蘆從知千古閑

風月只許詩人住石湖

效元白代書體寄西厓一百韻

故人何濶絕寂莫歲還更蠻雨經年信春風第幾  
 程清宵思舊侶旅感入新正憶昔遊銀闕相看滯  
 玉京松齋初識面柳墅各輸誠投分因求友論年  
 便喚兄狂言劇調笑閑事鬪聰明學忝羣公問詩  
 成朝士驚風流齊舉舉雅尚共硜硜文讌追王謝  
 歌筵雜戴彭篇章思振拔名姓願崢嶸仙桂分枝  
 折宮花並樹榮櫻桃當宴散蛺蝶上衫輕紫陌諸  
 郎讓紅箋滿座傾雙參花使位互奪酒監觥玉砌



從容入蓬山次第行金爐承御案銅鶴拱雕甍

殿上詩人袖宮中才子名俱蒙天一笑未被唱

三聲舊制臚傳唱第以三唱為率殿試卷余與西厓已拔置上第次日俱放二甲雲引

方登路輪摧忽陷坑九霄元自下萬事笑無成詞

筆嗟虛擲官資敢抗衡燕彊如病客花落似前生

戊辰五月引見乾清門余與西厓俱在選中余獨見黜落退舍予無利趨朝

爾小亨分張綸閣選乖隔鳳池盟七載歡華變三

秋魂夢并已下叙余戊辰東歸及乙亥京師會合之事丘遲賦巾帶韓

愈詠鷓鴣榮路看新進荒江伴老叟石罌資敗葉

塵甑仰香秔南國親漁釣西京冷酒鎗狂應思阮

籍病獨問劉楨已分林泉老難驅妻子縈豈期隨

省掖祇恐混優伶手板知顛倒頭銜畏使令尚容

求內職聊欲免官評重附雲間鶴仍呼谷畔鶯綠

楊分小弄明月隔雙楹細雨蒿迷宅斜陽鳥啄桁

夾城求翠竹老圃選紅榿鬪帖閑看硯徵歌喚上

箏銀鐙紛卷軸玉局散棊枰暇日惟吟藥通宵只

倒甕醉依曲屏幃香護密笈簪查榻常留被西厓為夏

重常置姜餐不割牲西溟不朝偷吏部甕夜撥翰

林鐙余踪跡日在實君考疎放憎南學肥鮮厭北

烹杯盤携並過酒饌遣相偵余與西厓每日必携酒肴相過早起率遣



人探候有無交轡三條近聯吟十里清花前衣黯

澹馬上髮鬢鬢席帽歸常失其籌出每盛時方過

寒食節及賜朱櫻已下叙西厓典試黔中忽值三

年賦憐為萬里征柳枝低拂馬荷葉亞迎旌草草

裝書劍蕭蕭束篋羸去愁芳草暗別記夕陽平藥

裹交亭長郵籤揖府兵斷橋枯磴黑野店亂峰頽

梅雨文章嶺宋九域志貴州有文章嶺茅煙犵狓城竹王臨水

祭羅鬼攏刀耕打棗當風鼓編蘆跳月笙打棗竿跳月皆

滇黔蠻俗棘人皆裹鐵洞女半垂瓔帶受奢香膩妝臨

葛鏡瑩卉衣蠻服幻木耳鳥言獍驛饌枕榔麪官

厨芍藥羹地卑山足氣天漏日無晴柳酒治諸瘴

鹽煙長亂蟲花名都未識草毒豈宜撻白紵遐方

雋紅袍小國英文昌隨例畫筆力與時撐燭盡煩

三覆花新試一鳴何時下湘水計日向南荆帆傍

琵琶落船喂鸚鵡橫磯頭大姥送江口小姑迎得

得離倉父騰騰見越媼溪亭梅入夢湖寺雪翻翼

園吏供茶串山僧餽筍萌昔遊如乍覺舊事若含

醒青舫應投玉紅樓定倚瓊幾時逢小小何處聘

卿卿野性疑迴篆閒情似散榜思君方布襪媿我

尚塵纓五處移藤篋三冬照鐵檠馬過窗外巷門



對宅南營

余寓居崇西坊南鄰四川營

陸氏窮兄弟韓家老舅

甥恒饑同鼯鼠中酒似啼猩蝙蝠虛齋集伊威破

竈盈蛾兒旋酒盞蟾子落書棚米盡花鈿折瓶羞

旨蓄屏髻斜通德影環探左家嬰春日愁難忘時

風學未精囊無萬卷賣人直一錢爭客久知窮轍

交疎見俗情同牀分上下鬪草定輸贏荒學三千

袞袞辭十四塋

同年宿草之墓已十有四人

賦誰憐束皙句偶

學陰鏗城北看調酪牆東漸鬻錫水邊人贈草野

外鹿呼苹光景此此換顛狂事事呈書從隔歲寄

詞憶小年賡潘岳明朝鬢應須白數莖

送張漢瞻歸省嘉定

囊餘萬卷不看錢江縣寒梅又一年種放還山惟

有母蘇君負郭只無田比鄰應怪籬邊客破屋仍

牽岸上船他日于公改門巷莫忘機杼舊三遷

過碧山堂杏花下與西溟感歎舊遊淒然成

詠

闌干閑凭旋閑行暗數殘鶯喚酒聲一樹猶然未

憔悴十年消得幾清明重來松石偏憐影舊識花

枝不問名醉哭東風兩賓客無人知此遶階情

廣濟寺海棠用東坡定惠院韻



天公不愛凡花木長與詩人慰孤獨三年得得背  
 江南顏狀逢人盡卑俗惟餘魂夢尚風流一笑相  
 尋向幽谷偶聞古寺有名花絕代天姿閉金屋急  
 借東家駿馬來不惜銀鞍磨髀肉玉膚醉倚可憐  
 風花氣如天看不足始知人世有西子妙筆誰能  
 畫温淑殘脂半拂玉臺頭碎錦平填石鼎腹祇宜  
 繞樹得微吟豈必鋪筵置絲竹從今絕倒薛尚書  
 泛硯飄碁空品目只教紅粉笑狂言風雅何曾盡  
 在蜀已上並見薛能海棠詩序不如吾輩別花人獨立春風幾  
 黃鵠長歌月下紫桐詩寺有紫桐一株冠絕都下更誦尊前柳

枝曲落紅有恨亦深愁故舊相看兩撥觸

閏三月十四日宋工部堅齋招同萬柳堂送

春二首

水部愛詩兼愛客為憐春去只須臾尚遲芍藥連  
 天賞已見櫻桃掃地無金谷好風猶小住平泉遺  
 跡未全蕪堂為故馮相國別墅今歸石氏煩君堂背濃陰下醉寫  
 城東序飲圖

到來忽得江南意盡日顛狂弄水涯斜郭數行名  
 墅柳小山一道夾城花看雲客自移舟楫鬪酒人  
 爭中戟牙是日賓主皆樂以射飲為樂携手東風問歸所不知何



西齋集 卷之六  
處是君家

題史耕巖學士下直讀書圖

蓬萊宮殿雲生棟玉蘂風輕鈴索動金坡學士被  
宣草朱衣小吏青絲鞵綠煙深影拂屏風黃麻熟  
狀東頭送末直秋雲亭下歸梧陰退食資嘲弄人  
間風月不到處天上紫薇和露種碧闌干墜水花  
香玉堂主人斷清夢有客門前求醉帖一笑詩成  
天宇空宮袍痕上散流香賜茗鐐邊開小鳳南唐  
佳紙墨相發西京妙筆書應中錦段長題行樂詞  
花箋半撰河清頌紫窄金鷗半臂紅銀井牀頭聽

鳴甕萬卷頻抽插架書不知硯北松花凍玉晨鐘  
韻曉參差猶自吟窗作孤諷君年正少登華省君  
才萬口爭喧誦風流直欲獵揚馬年輩還堪揖沈  
宋他日置君廊廟間大幹當須有強用西掖今居  
第一官知君不媿文章重種竹相傳談笑餘今之  
作手誰伯仲

夏夜與劉西谷同年論詩有贈三首

畫燭諸郎舊比肩文昌光景共相憐殿中取第仍  
同價花下聯名並賜錢一月差如公瑾小十年終  
媿照鄰前

西谷長余一月余與西谷兩試並聯名  
取第皆忝在西谷上故用公瑾照鄰事



而今空憶元和老詔寫丹青在集賢

樂天年三十六時詔圖像

於集賢閣

兩地家江隔歲分吳中詩酒斷知聞人間鈍拙偏  
敦我天下文章定屬君鄭氏谷邊吟夜月白公渠  
上醉斜曛何當公幹携才筆乞與幽齋定小文

年少篇章聞健時樂天風雅足吾師一生只對雲  
間客百世休論帳下兒冷宦局閒須自惜騷人道  
在豈終衰君家大有穿楊手孝綽文章夢得詩

西谷

為余言白詩聞健是趁健之義乃秦中方言如此今改為關健者非是

次韻答西谷

三日不見叔度鄙舉扇西風面常泚下車誤謁尚  
書家入門造席都非是不如却掃紅塵中歸來乾  
死蠹魚裏自恨平生愛鉛槧開卷還如風過耳連  
朝秋雨消百憂忽見門前枉雙鯉火急催詩畏友  
朋懶惰幼安方晏起還君遺我千瓊瑰何以報君  
只糠粃讀書萬卷想前輩一事不知足深耻君今  
文章當日進慚媿與君同甲子

豆花圖二絕句東野航

與君閑坐說江東秋實遮門氣味同最好豆花棚  
下月一叢輕送短籬風



插竹成陰每數家，鴨闌雞柵影橫斜。  
小園秋雨新過後，獨立中庭數白花。

酬西谷戲贈

小技文章得失知，平生點竄豈容絲。  
吟殘只可營堅壁，才退終難用曲師。  
笑我旌旗仍未變，任君巾幗竟相遺。  
白家格律休偷取，慚媿風流下筆時。

每被老元偷格律，西谷每以斯道相推故。戲答是語。

長歌贈王山人石谷

三吳例出能畫手，大雅百年不復作。  
華亭尚書王奉常，二老風流去猶昨。  
山人妙得流傳秘，筆力江

山破餘地追摹直，亂宋元間四海公。  
卿走書贄殿上承恩，宋供奉妙藝林泉亦飛動。  
尚方詔寫南巡圖，好手紛紜聚賓從。  
江東特致山人來，筆端造化生面開。  
玉帳牙檣自天下，春風柳陌千龍媒。  
潑墨煙雲十二圖，一幅青山盈十丈。  
道旁觀者百萬人，指點鬚眉皆在掌。  
廿載聲名達閤門，至尊玉几親咨賞。  
白衣更入承光宮，妙翰喧傳鶴禁東。  
布襪青鞋拜賜歸，蕭散不失山人風。  
長安姓氏滿華閣，爭致黃金換邱壑。  
廳前老筆將軍乞，月中宮扇才人索。  
一水直十縑，一石直萬錢。  
長年閉戶謝賓



客篝燈風雨揮雲煙東絹家家送一匹雜請終南  
兼少室古鼎竒花價頓輕只言願得山人筆萬卷  
峰巒散幽思今人無敵古人避誰看曹霸丹青引  
不數中興名畫記嗟哉同是天涯人翰墨如君可  
逐貧嚴徐揚馬若無遇不及溪山筆有神

題曹渭符采菊圖

曹善八分以書學供奉

小籬叢菊小山雲書破花前白練帚不使中郎筆  
憔悴還成元亮酒知聞詩懷淡蕩張三影人物蕭  
疎顧八分誰似高歌苑西宅黃花滿把醉斜曛

寄題許不棄竒逸堂

丈夫重家聲各自愛門第所貴君子居風流每數  
世子孫別賢愚誰作百年計京師得許郎孔李敦  
舊契家山閩城曲荆榛草廬弊不知何代樹落葉  
殘荒砌干戈人事更門戶嗟中替近年復茅堂髣  
髴歸舊制修竹廢泉斷叢桂小山閉蒼苔拂詩石  
手澤猶未瘞不待花木成野肴設家祭九京告先  
人淒涼數年歲余本孤孺子南向爲雪涕寄詩刻  
祠堂留以示後裔



西齋集卷第六終

西齋集卷第七

詩八十一首

戊寅巳卯庚辰  
辛巳官戶部作

初除戶部呈一二寮友

畫省墻東初拜時十年姓氏畏人知未妨嘯咏同

中散敢道文章在左司戶部舊以廣東為右司簿領署

名餘故紙風流得句有宗師澤州陳公新城王公  
一代宗工並居曹長

休嗟水部吟聲絕今日郎官解愛詩

城南八絕句和西厓

韋杜人家春事幽謝公小墅沈郎樓十年題竹詩

塵在歷歷城南數舊遊



煙帶青山柳帶城花間信馬暫閑行野人不識金  
閨客十里驚聞遞唱聲微之詩自序與樂天馬上  
遞唱豔詩十餘里不絕

小雨溪亭野水開朱門院院閉青苔楊花莫道無  
才思慣上紅闌拂袖來

愛酒憐詩踏襪新東風曾賞兩殘春五陵池上侯  
家雨知是長年偷釣人杜牧詩偷釣  
侯家池上雨

畫廳退食好風光金帶叢中鬪酒場煙雨不迷丞  
相閣綠楊遙辨午橋莊

金元文物草連空廉趙園林指點中才子郊居空  
作賦水南留與賣花翁

芳草郊原盤馬時玉鞭衫袖折花枝分明小市長  
陵路悵望閑吟芍藥詩

夕陽吟住入門初遠道驚傳枉鯉魚醉倚小桃臨  
水讀馬支山下手封書是日得友人  
馬支道中書

遊旃檀寺三十韻

唐代淤泥寺承平光景佳天衣千載佛春社八關  
齋寶相來香土花趺坐玉階文殊清似鶴摩詰瘦

于柴設供番中饌應時海外牌杖携江水影泥采  
雪山崖妙頌菩提擅香厨法喜偕梁武帝詔沈約  
撰菩提頌大同

日年長干寺設  
礙法喜食本餅光掩夢華鉢影歲褭講座看



象經聲聽怒豺石牀眠敗革藤杖掛枯骸正挈  
 蓮花侶兼逢芍藥濟水邊遙認馬柳下暗通街何  
 處聽仙鳥誰家載小娃玉梁冰合蘚銀塔雪銷槐  
 圓殿芭蕉結荒臺翡翠靈金鰲玉竦橋白塔芭蕉園妝臺皆一時遊歷之  
 所朱輪從後轉車製以輪之最紅袖向前又約指  
 黃金軟盤頭碧玉皆別簪鏤鳳巧時世搔頭謂之別簪小結  
 綴珠排繡綻鞦韆袴花裝蹴鞠鞋腰輕羅帶動體  
 弱錦袍諧書呪家人喜懸幡上首差不防衣露屨  
 都用手藏懷慣施靈童帽頻抽天女釵然燈依怖  
 鴿覓偈祝雄鷓鷓鴣之雄曰鷓鸞為相逢緩塵憐

過處理妙雲依席覆寶月掩門闔梳掃從年改風  
 光即日乖三生終有媿八喜浩無涯幽意凝花雨  
 春情茁草荻祇憐參法席綺語類優俳

從楊次也乞周兼美人畫

西京才子顧花叢始信人間有畫工顰笑似窺三  
 載裏短長原在一分中風流敢乞纖纖影心力看  
 拋脈脈功先與晴窗拂塵土玉鴉叉映小簾紅

送令貽之官銅仁四首

十年仍薄宦憔悴獨斯人江上如遷客天涯似外  
 心三生蠻雨足兩地峒花新吾道長流落惟應惜



此身

芳草沅江岸 羈縻一小州 山深長有氣 天漏亦多愁 得性宜開卷 銷魂莫上樓 夜郎才子地 為政自風流

愛客尚書逝 淒涼憶昔時 老成今不見 身世更何之 臨食應同歎 聞歌每共悲 唯將舊吟咏 留教長官司

尚有琴書興 幽踪數往還 我憐歸散署 君笑領空山 後會東西判 素心湖海閒 相思生別夢 都在水煙間

九月六日于禮部章雲招同黃自先孔東塘  
劉元歎三僚友小集分賦得元字

主人初罷南宮草 風月曹司與細論 但指酒罈誇後乘  
用黃公酒壚語 媿無駟馬過高門  
用于公事 尚餘荷鍤當時客  
用劉伶事 又見長身幾世孫  
用東坡贈孔君亮語 醉折茱萸開口笑 玉鞭側帽月初昏

燒香曲題野航所藏美女熏香圖

西風吹簾玉 丁丁秋燕欲歸語 畫屏泥金雙帶小 衫妥狼籍半牀初 夢醒綠熊卧席後 猊押丁緩薰 爐睡銀鴨美人徙倚未更衣 金閨新試燒香法異



香如豆火如花獸燄餘紅流碧紗相思一寸已灰  
燼猶愛殘煙數縷斜小插銅瓶倚東牖妙選寒枝  
出纖手分明周昉內人圖玉體橫陳委春柳散花  
綾覆半篝空髣髴周防芳氣走勸君切莫負香衾  
願作熏籠永相守

詠黃刑部自先庭中秋柳二絕句

牆陰清影拂東鄰只受斜陽不受塵却似開元一  
株在西風憔悴為何人  
長條盡日惜風流獨掩書牀入暮秋留得黃花應  
有意伴他老子南樓

移居答野航見寄韻

王翰頻年願卜鄰窮交終歎白頭新三生洛下清  
吟客十載江陵借宅人結轍虛勞長者問臨池何  
用小兒嗔劉夢得詩小兒弄筆不能嗔孟光已有東廂屋紙閣  
蘆簾不待春來詩引樂天來春更葺之句見貽故云

再用前韻東戴評事占

戴時同儁京江相國里第比鄰而居

踪跡幽棲每擇鄰綠楊明月往還新平分宋玉東  
牆徑同作曹參後舍人酣叫不防高士覺歌呼幸  
免相公嗔他時祭竈如相問過酒休忘麴米春  
張寄亭同年席上詠石花魚得職字



南魚賤如土數斗不論直北魚貴如金萬錢乃敢  
食長年綠江魚盈車大可識其次數灤州嘉味鯉  
與鯽更聞秦晉間石花美無極玉芝餐入髓紫筍  
填滿臆誰與送羹材道遠不易得憶昨十年前方  
丈尚書側食案初見之雙眼勤拂拭碎雪落銀絲  
脂膏共拆齏前年貴戚家再見詫殊特公子爲余  
言異味難自匿 至尊厭常饌夜半降 墨勅密  
詔打魚來戒不煩民力宣賜充金盤受之饗人亟  
腹腴飽賓客放筋增太息今日張侯案鮭菜羅南  
北通印大哉陳槎頭美鮓抑法傳中饋錄烹盡膳

夫職中有天門產贊客皆震仄我因論魚味京師  
合四國頻年江湖通往往竄名色高價取易售卧  
沙雜細肋君偏致遠物鷹窠擘嶮峭朝來設膾成  
招友煩子墨新年作新歡便飽張侯德

和元微之醉詩十二首

先醉

花下傳籌未越巡等閑逃席似窮賓飲名諱道年  
來敗却說春風易中人

獨醉

風雨貧家客不來春愁如海病難裁殘尊猶喜牀



西齋集 卷之七 六  
頭在手自封題手自開

宿醉

謝家曉起笑扶行也悔連宵帶薄醒但願常年似  
寒食朝朝新點杏花飴

懼醉

蠡杯米碗讓諸郎雜食羞隨到後堂還恐風流餘  
習在尊前又放十年狂

羨醉

歌舞堂中倒玉壺滿身珠翠十眉俱南朝風月真  
無價私寫韓家夜燕圖

憶醉

花在長筵酒在尊顛狂如夢與誰論旁人未省春  
衫泣爲見當時舊酒痕

病醉

擁鼻騰騰遶柱行稍聞花氣覺頭輕今朝若舉飛  
觥令祇可閑徵藥草名

擬醉

不應人事不應官上番梅殘二月寒除却判花全  
未了好將連擲賭頭盤

勸醉



西齋集 卷之七  
朱門靜處看鞦韆下馬文君市肆前忽見書旗誇  
酒字提壺又喚小桃邊

任醉

傾缸美酒恰三升何事區分淮與澗天上歡華難  
滿眼人間萬事且僂僂

同醉

十年序飲共春宵不省花時不見招袁尹笑他無  
酒伴偶來竹下一相要

狂醉

春鉤暗處送卿卿斜撚金釵擲目成紅豆曲闌銀

燭換不知燒盡短長檠

紙衾和次也韻

皺似春冰白似膚夢回魚網起廉隅蔡家杵臼傳  
新樣姜氏裁縫改舊模不使官奴臨案寫只教小  
玉上牀鋪安眠欲向天公問償得書堆宿債無

大理石屏歌

我生羈宦不適意到眼不見江南山出門逢人看  
古畫往往夢落煙霞間于家小屏才徑尺林壑天  
然來几席即潛南省退朝歸擁書萬卷城西宅隱  
囊玉局石屏下蘆花坐想江天碧人間空有輞川



圖幽亭斷岫無行跡不如時時開眼雲月明北窗  
 一笑秋山生恍疑歐公鴉樹在歐公有和張生鴉樹屏詩忽訝  
 小范風林橫東坡以月石風林屏贈范純父長謠斗酒惜塵土煙  
 樹窗中列可數一山紫翠忽飛來却恐中庭變風  
 雨

和野航金水橋咏水禽四絕句

舍人獨出紅蘭署橋柱閑聽白鳥聲寄語散郎須  
 小立相逢似說故山情  
 屬玉觀前春水好宜春苑下綠陰多應憐未解金  
 衣舞不入宮中黃鵠歌

白石螭頭語曉煙珠簾禁殿閉年年羽林大有青  
 州弩莫更羣飛下弄田

宛轉粟留方得意聰明鸚鵡却當時夜來也近長  
 生樹偷頌花間羯鼓詩

元祐黨籍碑歌

風雨南山一片石千載猶看餘媿色不作峴山亭  
 下太傅碑不作征西墓上將軍碣嗚呼斯石何不  
 幸乃書元祐諸臣之黨籍城東好事王舍人遺余  
 拓紙字漫滅傳觀三歎紹述初小人復用國柄竊  
 三吳書畫鬪奇巧百戲青紅亂宮闕父子齊登伊



呂榮弟兄獵進夔龍席斜封門下擅黃麻墨勅中  
 書傳白帖九天呼吸蛇霧昏四海一朝變霜雪元  
 臣者舊不敢哭門生故吏都遷謫三百九人文德  
 門書名書爵汗東壁建中靖國元年定黨籍止百  
 二十人五年重定元符末上  
書邪等者合為三百  
 九人此碑五年書也紙尾何人署大惇賢奸緇涅  
 羞同列碑尾有章  
 惇姓氏相傳誣染出私人強葉依稀記  
 賓客君不見東漢黨人三百人姓氏曾藏王府牒  
 甘陵二部相詆訶洛蜀兩家分軌轍建中歲月今  
 幾何白馬清流泣殘魄大石麤沙磨不盡留與書  
 堂數人傑

次陳侍讀白桃花本韻二首

楊花同占禁煙村天上繁華不並根宋玉墻邊如  
 斷夢薛濤墳畔與招魂吐來春袖全無跡畫傍朝  
 雲豈有痕好是水晶簾下見洗紅斜倚小樓門  
 記否平陽拂面時白人披掩出新姿浣花箋換風  
 流樣桃葉歌殘黯淡枝但覺多情依小玉可憐無  
 色比紅兒劉郎去後燕支落惆悵東風第二詩

寄懷西華令徐去矜同年

大河西來疾如箭羣山忽斷通淮汴陳項以東數  
 十州水田萬頃桑麻賤典農無復鄧士載白雨蒼



煙遺跡變淮北當時二萬人軍持千里忘征戰地  
力荒蕪數百年空見徵符嚴郡縣徐侯年少視吏  
事鑿水重開柳陂面閑來閉門讀書史乞我新詩  
付殘硯自媿中無濟河論傳觀不足驚曹掾方今  
海內正無事父老常懷鄉國戀如君落落有數人  
伯表餘風何足羨獨嗟爾我漸華髮清夢難追十  
年宴相思何處春水深浮雲落日長舒卷

苦熱寄西厓二首

故交還往絕高車堆案何堪束帶餘此日漫嘲徐  
散騎相看誰顧李尚書共知溽暑如醒醉

柳詩南  
州溽暑

如酒醉如酒終歎清風似客疎苦憶江南煙竹裏閑敲茶  
臼小園居

姑射誰登避竈難陽眠只是卧琅玕直疑長日無  
生意不信人間有冷官還憶南皮沉李樂敢忘玉  
井賜冰寒知君未得催詩雨常向闌干徙倚看

題王山人石谷騎牛還山圖

王宰拂衣去獨騎黃犢還秋風虞仲宅落葉子游  
山階下當歸長門前小草閑煙霞應有恨傳寫滿  
人間

山人以所寫竹趣圖見贈題四絕句報之



小小溪亭水石鄰郡南髣髴一家存主人但解通  
賓客袁尹風流肯到門

憐我平生偏好事蕭郎頭白尚相過江山夢入湘  
妃廟惆悵丹青畫竹歌

空庭月落筆無塵醉掃鴛溪百尺新三昧君能兼

老可不知遊戲定何人

東坡題文與可墨  
竹詩兼入竹三昧

紙窗晝寢日如年誰買清陰六月天他日草堂看  
畫去江東管領好風煙

九日同西溟野航西厓蕉飲登慈仁寺毘盧  
閣用亭臯木葉下為韻各賦五首

城西有飛閣百尺凌蒼冥下臨忽無地萬物疑一  
形石闌出雲霓千里延郊坳不見雲外山但覺煙  
中青百雉隱列剎天風清塔鈴長年送人處夕陽  
笑空亭

煙火十萬戶車馬如秋毫中有雙鳳闕勢與諸天  
高吾曹百僚底聲名一鴻毛空有遠舉志孤鶴唳  
九臯文章本無力難為知音操學地生隱心不如  
守蓬蒿

佛教來中國江左稱老宿維摩亦有言議論九十  
六前朝崇象教開林飾珠玉寶相籍閑安天衣光



可掬空中四照花  
髣髴鵲山木何時逃  
火宅妻子脫屣速

幽并百戰地生士  
多任俠盤馬上東門  
秋風縱郊獵黃沙  
萬里平天與窮荒  
接燕雲十六州  
山河積寒雪白骨  
野草埋石田觸畚  
鍤銷沉范陽兵  
歷世今幾葉

斜日忽西落幽懷  
不能寫暝禽歛來  
往人語息原野俛  
尋萬仞梯拂衣雙  
樹下情塵積爲岳  
浮生歎不捨得酒  
且相覓呼童致菜  
把騎驢歸去來莫  
遭官長罵

詠野航齋前所蓄白鷺雛

少小煙波掠葦叢  
霜衣曾伴杜陵翁  
寧貪金闕三霄露  
却背江湖萬里風  
靜看梳翎添檻碧  
有時翹足映花紅  
舍人宅裏相憐惜  
生長俱同水國中

題喬無功蒹葭書屋圖與西厓夏重同用東坡寄傲軒韻

與子各好飲相見  
驚兩禿蕭蕭滿蓬  
鬢祇可岸高

屋

齊梁間有高屋帽

一身違故山無竹  
即已俗況復混塵

土受此束帶辱子  
雖不得志良馬未  
駕轂風塵傲三公  
雲水長四瀆柴門  
白田下小艇蒲帆  
六徜徉



去湖海魚具辨粗足野蔬僮早撝斗酒婦久蓄一笑酌青山春波釀寒綠不識謝宣明不署徐干木日飲真無何只望秫田熟

與西谷誦夏重竹林僧舍用昌黎短燈檠歌韻之作因各次一篇

我如黃鵠清而長君如白璧溫且光龍鍾各年三十九眼中閱盡炎與涼叩門只有數游好終朝詩酒連繩牀浙西才子長安客春官三上蘭成策人間嫫母偏易嫁越女羞稱天下白新詩逾好應無前醉讀百回夜不眠老筆凌雲真縱恣團扇清光

奪翡翠與君太息當途人有才如此長淪棄

喜西厓改官給事中

海內才名三十年詩人例作拾遺官蘭臺共喜軒車聚畫省空傳梧竹寒直道漫焚封事草清時不用惠文冠祇憐未獻河東賦江左徒留子布看

午亭山村圖歌爲澤州尚書陳公賦

公乎愛山買山住花木林泉入煙霧鸞鶴雲霄四十年清夢長留太行樹午壁亭東澤水流空郊杉栝風脩脩山僧手開翠竹寺行人就宿桃花洲楊柳東頭曠平陸桔槔春水清于玉雲中雞犬喧小



市隴上牛羊散斜谷風流步屨南山村中有獨樂  
五畝園野鶴無心自來去青山爲屋松爲門公思  
此景歸未得畫圖急遣王生筆百道紅泉天際生  
千家綠樹煙中出草堂幽徑古道邊丹山樓閣俱  
飄然雲封賜書閉石室風動垂綸留畫船我從公  
游聞公語談笑從容論詞賦家山指點秋毫末此  
是平生釣遊處野岸春還枋口花雲林下有朱門  
家悄然坐我王屋下眼中籬落開煙霞澗流八丈  
峰千尺門外蒼然何代石自是山公有幽意衡霍  
近在王侯宅小沁城西翠色新村社雞豚更幾春

青溪紅樹不知遠因公欲問山中人

題顧進士有常雙喜圖

南山靈雀畢逋尾北客咨嗟南客喜五色文章翡  
翠衣朝浴銀河夜丹水顧君皎皎鸞鳳姿三入長  
安取青紫家人春夜祝燈花早起羅巾上蟾子窗  
前雙鵲來報君相對楂楂鳴未已舉頭但媿不能  
言似傳姓氏書名紙近銜丹詔下鸞坡遠送泥金  
歸鶴市極目煙霄不可量他時一舉君千里好誦  
東坡異鵲詩兩兩棲衙從此始

送西谷視鹺津門



海于天地間百川水所宅煙波本無心何事勞煎  
迫京東四州境蒞薪伐窮澤萬竈生青煙匝岸浮  
霜白五陵卿相家鍾釜食指劇蓮勺供虎形水晶  
點行炙長安百萬氓十口算禹筴老男及少女一  
月一人籍水國繡衣使門外陳棨戟長年大農帖  
捆載連車輓劉郎富才調本是石渠客改官入南  
臺摩挲府中柏諫紙未盈箱忽奉鹽官檄紅旌引  
驄馬秋老東門陌執手平生交柳下羅燕席酒闌  
爲君言行行困乖隔方今太平時少府錢充斥本  
富藏四海民力良可惜 聖朝尚寬大屢 詔減

賦額吾曹固文士少小愛風格上體 天子心下  
畏僚友責勿學桑大夫胸那煩計畫勿學張平叔  
交手課陽翟贈言以當別願君重圭璧西風帆扁  
舟木葉空蕭槭冠蓋忽已分斜日遠水碧

毛生子開歸黔中用昌黎雪後寄崔二十六

丞斯立韻東令貽

長安浮雲暗天關春風不到南荒山五溪三澗足  
卑濕嗟君兩落蠻獠間萬里一官背妻子簿書堆  
案凋朱顏毛生遠來慰我意摳衣翔步雅且閑相  
如入室真弟子有才不用如蒯管袖出君詩發異



采峨蒼天際豈易攀春江之水綠蘿合叢竹如愁  
 誰與刪相悲相失不相見但對木耳垂金環十年  
 仕宦尚塵土強弓寸寸不可彎蘭臺故人初拜  
 命時同年中同日一笑已破造化慳期君努力事  
 課最束帶趁此腰脚頑

酬陳子文員外見寄之作

三載省郎憔悴客也隨花底散朝迴每從眾裏嫌  
 官職強向生前鬪酒杯李氏舊書誰借與用歐陽公借韓  
 集柳家新樣許偷來子文工書只君便是陳驚座何處  
 相要解愛才

題新城王尚書荷鋤圖

謝公愛栖遯心跡循歸路秋山無淺深獨往自成  
 趣平沙白石淨野水兩迴互老樹一徑斜墟曲數  
 家聚願作隴畝人手把田家具隨意入溪口悠然  
 忘日暮風竹隱禽聲空江野色赴柴門忽不見稍  
 辨煙中樹何處遠山雲散作前村雨

咏燈花二首

十載家人卜夢曾小紅如意上銀燈應憐詩老無  
 多酌老杜獨酌詩燈花何太喜共道先生自此升舊淚銷磨還  
 戀客殘書檢點不成僧玉堂枉鬪新佳句伴直相



呼恐未能

東坡夜直玉堂詩  
喜入燈花欲鬥妍

煙滿重簾月滿紗短檠遊戲作鉛華家貧忽有錢  
財喜老去偏憐頃刻花東閣棋聲光並落西窗夜  
雨影初斜主人無事勞相報空媿風流侯喜家

次韻蕉飲東西厓

黃庭一卷苦未熟萬念皇皇日輾轉閉門著書論  
當世下筆欲掃三千牘饑寒雅不問妻子數口低  
顏強食粥案堆黃韭庾郎鮭厨烹紫蓼周家藪故  
人湯史吾同好不學搔頭事邊幅送老清吟數百  
篇疑聽哀聲匣中筑平生祇合守陋巷束帶何堪

作臣僕湯君趨省列諫官青匭時投交午木史郎  
十年滯鳳閣仕宦如樵終不速媿余執版詣陳蕃  
豈合才名號龍腹只有判花興不忘飲罷中庭月  
可掬作歡我笑阮嗣宗白眼終朝為誰哭六十悠  
悠一致耳凶吉徒勞問於鵬黃金虛牝莫輕擲空  
洞何曾置藿肉勸君慧劍割恩愛兜率須歸老禪  
宿他時一唱小山詩叢桂秋風營比屋

楊郎中種白蓼花一本於戶部廳事前幽意  
可愛秋來凋落感賦長句

仙郎手種花如雪草木幽香落印牀野色未能逢



柳暉白頭應笑似馮唐坐看風月清如此共有江湖夢未忘怪底秋來無意緒不留吟咏到斜陽

題朱悔人詠王尚書齋居草木詩後

閒看草木愛郊居好繼王郎十詠餘江左諸賢已零落風流最賞沈尚書

高堰行寄戶部侍郎德州田公

淮山青青河水渾漕粟東南二千里水衡日費百萬錢南山銷磨淇竹死天子咨嗟命水工作歌不作宣房宮九官連翩各開府泥行蹈毳如乘風萬夫登登夜版築下窮窟穴蛟龍哭水門股引

六斗泥何用長茭與美玉蓬窗一卷河渠書天公已欲安淮徐兒童拍手父老喜萬古微禹吾其魚高堰之高高百丈堅地湖壩束陂障煙波何處得龍骨白馬金隄正無恙汲鄭當年策亦良桃花春水猶湯湯賜金莫羨王延世空地絕倒關子陽清流分處見淮海公其歸來調鼎鼐神沛已知河伯仁使者毋將衛人罪賈郎三策報吾君綠疇畚鍤看如雲而今冷笑龍門令負薪空自從將軍移居和白傳與元八卜鄰韻東松坪二首晨夕相依始是親共求閑地寄閑身何愁風雨還



如晦從此年光不負春天上有星歸舊井人間無  
 價買比鄰只憐才退心情減難示孫郎帳下人  
 長年悔與簿書親計日收回文酒身一卷花光連  
 老屋兩家詩句鬪青春賓朋不辨誰為主圖史于  
 今始有鄰却似靖安坊裏住往還減却送書人

移居靖安坊詩更喜往還相去近門前減却送書人

題趙松雪畫淵明撫松圖

圖為莊逸羣同年所藏

長松如高人避世獨無伴落落天地間不受俗情  
 玩陶公休官歸三徑跡可按愛此偃蹇姿盤桓忘  
 日晏蒼龍結偃蓋不及南山半悠然西廬側甲子

誰與算流傳鷗波翁放筆為直幹霜皮二千尺風  
 雨脫手腕笑彼五柳質尚作溝中斷髣髴斜川人  
 折腰嘗自歎東晉板蕩餘與世若冰炭恐為斧斤  
 求虬龍充釜爨遺像追淵明斜陽角巾岸蒼顏相  
 對清一醉落里閑嗟余困微名四載滯冗散遠媿  
 八十日心似謝公亂偶來南窗下看畫發悽惋草  
 木尚如此空歌白石爛

酬子文寄題西齋屋壁之作二首

每憶城南修竹連蕭然長日病夫眠閑談共舉江  
 湖事清夢時尋草木綠羞澀終慚書未聖窮愁却



笑酒空賢風流我媿膠西守詩卷飄零四十年東坡

年四十知密州西齋詩蓋公密州作也予今年亦四十四矣

詞賦流傳愛左思鄭家奴婢亦吟詩此生應與文章老舊隱何慚猿鶴移三徑止容元亮入百年終有子雲知江田負郭荒蕪甚誰乞東歸陽羨資

唐玉笛歌

笛為孔戶部東塘所藏

崑山黃玉天下稀三星為眼雲作衣何年織手破煙雨珠簾歌斷宮花飛開元天子風流絕李暮老去亡音節吹裂山東二百州至今明月傷離別孔君好古入骨清獨愛人間古樂名忽雷弦雜花奴

鼓與此三物同宗琤

孔君家藏唐小忽雷羯鼓與玉笛皆奇古夜半牀

頭鬼神泣前身應是江山客桓伊灑淚曲未終石城野水無情碧

十一月二十五日送雲岡歸松江用東坡別

王子立韻

三年做盡黑貂裘獻賦相如未倦游老馬空餘千里志書生難為一身謀江邊畫檝風添腹門外青山雪滿頭莫笑平生嫌戶小歸來新號醉鄉侯

代錢衡送別再用前韻

安得人間萬里裘伴君霜雪故山游但聞歌曲銷



魂別不用文章向野謀四海風流習鑿齒三生書  
卷賈長頭明年瓜果清宵會腸斷青陵憶故侯

雪夜和馮留士韻

誰言好物不牢堅且鬪斜風共撲綠窮巷盡如無  
事日西窗長似欲明天陸郎舊識斑駁恨江令應  
生玉樹憐此夕羨君名士飲兩牀絲竹酒罈邊

西齋集卷第七終

西齋集卷第八

詩五十九首

壬午癸未至甲申  
二月官戶部作

新正同松坪耑木蕉飲西厓詠盆中三首

松

蒼龍今幾代留此種時孫白石根初託青雲勢已  
尊庭空低蓋舞風動小濤喧詩老成都宅淒涼可  
共論

竹

一夜湘江雨春陰翠欲生清霜微有節寒玉尚無  
聲好待平安報還來故舊情官奴知秉燭新畫小



西齋集  
卷之八  
枝成

梅

同是江南客空憐座上春  
開宜封北戶飛不到東  
鄰煙雨何知恨風流亦有神  
未應催我老莫比白  
頭人

藥酒

酒聖誰傳肘後方醉餘春病入膏肓  
將鬚豈有君  
臣意適口惟聞草木香夢到橘林疑是國  
偶逢竹  
葉即為鄉平生禮法常踈放自笑年來日飲狂

紙帳用東坡韻

藜牀猶喜故人連懶卧應嗔邊腹便才子更誰知  
錦被用南史劉孝標事詩人自古惜寒羶梨花有夢疑看  
雪柳絮如煙不見天此夕似歸湖海上醉來橫抱  
白雲眠

題西厓所藏元王孤雲畫九成宮圖

九成之宮何奢麗丹青不絕傳今世岐山百里蒼  
翠開臺樹參差入天際架楹竦闕鑿羣秀長松怪  
石分竒勢憶昔開皇締造初山河帶礪猶綿蕝空  
看陳宮三閣圖殷鑒誰為太平計力役煩寃新鬼  
哭百萬翻教賞才藝後王煙水愛揚州玉殿陰陰



綠苔閉東都無人問仁壽朝開西院空流涕晉陽  
 龍起白麟來風雨興衰凡幾歲楊公斷手魏公銘  
 百步清泉夕陽逝唐家太平暫臨幸置官居守煩  
 宿衛更聞避暑借岐王天書一紙娛兄弟杜陵詩  
 老仰嗟歎貽謀未善由文帝君藏此圖作詩史風  
 漸箴規若龜筮

和人詠筆牀

碌碌毛生倦豈知卧如山積復如錐桂枝曾入吳  
 均賦梁吳均有仙物空懷曹植詩見梁元帝謝東  
 宮賜白牙鏤管  
 筆未許道人先作冢長看子弟欲臨池玉臺不敢

輕離手好伴珊瑚架筆時

題汪悔齋太常觀海圖遺像二首

海外文章絕代才天輪地軸筆端開流傳不數立  
 虛賦何止橫吞雲夢來

五兩天風萬里長黃支船小入微茫人間畫像如

傳去風貌猶驚可老羊琉球國王名可老羊見北史

七夕澤州陳公召飲邸第即事二首

東第微涼玉露清不須烏鵲報新晴曝書聊復庭  
 中事賜扇空餘篋裏情洛下才名求八顧關西人  
 物壑三明問公欲乞天孫錦許向絲綸閣下行



西齋集 卷之八 三  
神仙才子下蓬萊玉匣清吟暮景開千里明河橫  
几席萬家秋色聚樓臺褚淵自欲携琴至謝傳驚  
聞弄笛來此夕北堂涼似水新詩好借拂塵埃

登澤州公宅晚晴臺限晚字

西山如駿馬逸足犇長坂高臺招之來空翠竟不  
返尚書退食暇庭戶花竹偃詩地興有餘文章識  
微婉朱闌過疎雨秋氣卷雲巘始知君子心登眺  
獨閒遠三載趨省墻晨夕陪車幘時於百僚上誦  
句憐鴛蹇收爲杖屨遊飲食荷繾綣明月照綺席  
高論抉文苑仰窺鄴侯書陋若飲河鼉空慚沈范

賞從公嗟已晚

遊城西南三首

呂仙祠

天風吹客衣飄然仰高閣入門綠樹靜階下野花  
落汲井泉味清疎畦灌藜藿悵望雲中君神仙邈  
難作

黑龍潭

清溪片雲起寒山忽已夕飛雨過城西返照一潭  
黑何年海氣來蛟人卜茲宅默禱願年豐哀我田  
野厄



陶然亭

秋水延遠目孤亭得天趣殘鐘古寺煙野氣前山  
樹魚鳥並忘機悠然平渚聚誰人安釣艇好泊蘋  
花住

同夏重詠白杜鵑花

越州殘夢報開初一曲新樓月影疎李紳在浙西  
有杜鵑樓

苦憶西川杜詩老獨依南澗白尚書驛中淺紫煙

消後元微之有青山  
驛紫躑躅詩堂下深紅色退餘東坡有菩  
提寺南漪

堂杜鵑  
花詩試問玉京天上客春心相託定何如

贈東海公孫于朝兼簡師魯

崢嶸頭角見諸郎萬事淒涼夢後堂鄭氏小同傳  
舊學到家少蓋有文章人間將種生無敵海內恩  
門老未忘從此公侯應許復青春雛鳳好風光

水匱歌并序

世傳西洋水匱為救火之具其製以木為  
匱銅為筩中可貯水數斛筩之下機軸連  
環用人力擠之水便上射東西高下隨手  
所向遠至數十步外邇來閩人亦能為之  
余因作歌以紀其異

歷山山下千年銅化作人間百丈之神龍口噴白



雨如撒菽天瓢倒勺蛟人宮我求于龍寘火所水  
妃騎龍入融風大龍小龍各來鬪羣雌不敢當其  
雄東門舊客歎神力仰視屋瓦飛相從祝融告休  
玄冥笑擘山翻海龍之功我從父老問其製海客  
虬鬚傳近世八閩國工竊天巧轉機削軸若符契  
十夫之力遠可將貯泉百斛憑水遞長疑上帝賜  
九河天跳地蹕不爲厲君不見天漢西頭火氣昏  
鄭災不用禪竈言瓘竿玉瓚襍無用恨不移置司  
宮門又不見成都市上酒如注喫來餘臭爨巴雨  
神仙之術亦偶爾水龍今在復何懼爲語西京劉

子駿龍乎龍乎亦雨具

壬午十二月二十九日

召入 保和殿

賜 御書 臣曠得唐祖詠詩闌前花覆地竹

外鳥窺人十字即事紀 恩有作

天門初日照蓬壺俯視西山似畫圖雲裏曾遊三  
玉殿袖中新得十驪珠子孫競喜傳家好鄰舍驚  
看燭夜殊他日林泉買花竹可知雨露到江湖

咏白丁香二首次子文韻

細膩風光意未厭小齋幽思爲誰添長迷畫閣低  
雲角欲近書窗鬪兔尖漫許飄搖同約素縱教刻



畫笑無鹽水妃一覺東風夢獨倚人間丁字簾

鏤雪雕冰滿地温淡煙斜月入黄昏馮唐羞對滄

浪髮宋玉難招寂寞魂帶結少年愁洛里用玉溪生柳枝

詩花疎詩老詠江村用老杜江頭五咏事多生自有春條恨

暗雨芭蕉共掩門

題徐虞門都諫宣沙視牧圖

雲州雄鎮天險絕九月寒風利如鐵鵬鷲堡西秋

草肥渥洼萬騎長蹄齧徐卿豪氣天下無驅使官

奴憐汗血短衣匹馬看射虎一夜踏盡陰山雪君

不見天子之馬十二閑飛龍紫燕三花斑千金駿

骨不易得徒令高價留人間漢家當時玉關閉輪

臺逸足空山斃可憐開元四十三萬匹碌碌都隨

張萬歲前年將帥出征西清秋落日聽鼓鼙黃塵

無光黑川渡蕭蕭夜半驕長嘶大小青山插天起

平沙萬里駝秋水地上何人賞神駿只為三軍託

生死嗚呼劉公的盧不可追温侯赤兔徒爾為平

生一顧遇伯樂橫門報恩亦有時徐卿戟髯仰天

笑慷慨為賦從軍詩

二月九日過子文隱綠齋看花小飲次韻

白馬翩翩老季常風流五字敵韋郎題名都用尚



書筆 召直曾携太一香春至共貪花氣醉興來  
惟見草書狂閑曹却笑真多事偏占人間翰墨場  
送翁康飴同年督學廣東二首

楊柳東風旌旆催蠻花含笑馬前開此邦再著蘇  
夫子今日誰當翟秀才舊社却逢初飲水生衣半  
點落殘梅共知海外文章伯携得珊瑚鐵網來

五載同趨直省班羨君去住只蕭閒好將青瑣囊

中筆為寫黃茅瘴後山訪舊梁鴻春白下

謂藥亭同年

招魂屈子水雲間

謂翁山人

龍人蚤戶傳新詠直使

承平景物遠

題子文夢墨樓

曹公石墨十萬片三臺一螺送書笥東坡家藏三  
十九龍麝還求永寧第二公風流絕代無拂紙羣  
鴻共遊戲人間玉玦不易得北海凋亡墨官替燒  
松遺法竟誰傳空見徂徠日憔悴陳侯二十愛學  
書野鷺朝臨會稽字小窗清夢隨寒鴉萬寸珪璋  
堆冷翠覺來下筆忽有神一揮百紙雲烟麗翰墨  
磨君四十年天公詭譎聊相試今年 召入蓬萊  
宮集賢學士驚絕藝霏霏雲霧繞長身歸來更拜  
千金賜諸豪爭致陳孟公姓氏喧傳到童稚尚書



隄麋乞判牒觀君落筆圍羣吏濡髮清詩自寫成  
 鄭虔三絕君兼二我生愛惜一點漆程邵桑吳貯  
 盈噐程君房邵格之桑林里吳去塵皆近代墨工薑芽對君難出手應  
 笑羊書似奴隸元和新樣吾所畏餘子碌碌猶兄  
 弟君偏假借獨見推草書不暇羞螳臂煩君為文  
 弔剡藤肥瘦何人識真意海內若無張伯英羅趙  
 紛紛亦何媿

寄題龔敬立意止齋即送其歸婁東

吳市曾聞梅尉聲謝家祖德舊知名龔氏自安節先生後世有  
 德遺風猶識漢三老余十五六時曾識其伯氏劬菴先生物論還同

楚兩生敬立少與兄義存齊名宅繞新畝渾舍喜門臨春水

舉家清試栽慈竹高堂下應惜潘郎賦未成余與敬立

皆有老親而余獨不得歸故落句及之

送杜讓水之官處州次子文韻

天門舊路昔曾攀供奉當年鬢未斑時論縱教輕  
 白髮君恩猶許乞青山陽冰遺墨千秋後靈運  
 風流兩郡間莫道前驅輸五馬古來司馬一官閒

蹇驢

旅食相依三十年朝天路滑不勝鞭面長每被孫  
 權笑聲惡翻因王粲傳令僕有才何止此怒蹄無



伎亦徒然曜靈殿上如相問也博君王一愛憐

王少傅文靖公挽辭

先帝親臣第一流功名終始鳳池遊  
兩朝社稷承遺詔萬里江山預密謀  
畫像人傳宋司馬歌詩家說漢共侯  
三年絲竹音塵絕獨有彭宣淚未收  
從兄條聞訓導望江詩以慰之

吾家九兄弟少小生門閥傳家有賜書  
聲譽未汨沒阿兄儒林秀才筆獨自拔  
磨丹事鉛槧甲乙忘歲月先公所愛憐  
早賞千里骨至今一囊文夜半光燄發  
老大才命違天不補黥刑學舍竊微祿  
低

頭學干謁書來聊自笑一官忍顛蹶  
江行家半西倉卒換巾襪平生畏波濤  
夢落蛟龍窟水雲如屋舟秋聲眇林樾  
京師老郎潛人事多于髮中年覺哀樂  
手足痛存沒淒涼大雷岸草蹙淚已竭  
零落阿買書不得繼勳伐

近張氏猶子邀相繼凋喪

幽懷無可語

吾處若株檠五年從奏事起草空書笏  
篋走神仙魚衣藏主簿蝸羈宦尚未歸  
躑躅溷隸卒病馬饑渴同誰與芻豢斲  
空齋種苜蓿一飽歌城闕

詠庭中老樹次趙恒山韻

摩天拔地老風塵雪壑寒枝未肯春  
龍虎自成千



尺勢虬蟬難撼百年身東陽太守真知己  
穎上將軍是故人我亦平生不材者  
卜居為此獨相親杜老

相樹詩誅茅  
卜居總為此

追和令詒戊寅詩四首

沂州旅夜見寄

春蠶絲盡已無眠回首東風去國年  
一紙書題千里月半生官上兩漫天  
人情應悔杓當鑿歸夢猶驚矢在弦  
莫道東坡真已死天涯子厚為流傳時都

下有傳令詒死問者故來詩  
有幾望生還存死友之句

三月三日遊城南

一官未達世所輕心如駿馬驕不行  
偶離櫪下出城市始知春草還多情  
舊遊似夢不可名王郎落筆詩寫成  
六年光景一開卷疑有花竹來相迎  
我生讀書老眼明插架萬卷連軒楹  
時無俗物心適清江河何處浮木罌  
為問人間太瘦生百年筆硯徒縱橫  
恨君催詩作強敵無日無君剝啄聲

戊寅正月至京師作

才名廿載在朝廷共道中郎有典刑  
殘吏空教飛讞篋書生終自抱遺經  
黃當漫著貧家賦青草新題陋室銘  
寂莫牀頭書萬卷閉門何日弄添丁



近年令詒有  
喪子之痛

題西齋詩卷後

清詩天地與長留短李難追是昔遊拔士曾逢許  
平輿讀書終媿鄭台州文章敢道輕千首當代誰  
居第一流楮葉未成還自笑任他覆瓿為人收

題蕉飲使滇集後四絕句和西厓

使節西南萬里馳才名偏許楚僮知不教夜渡青  
蛉水為要先題金馬祠

滇國曾開異姓王椽船銅鼓摠淒涼一從李白空  
歸去今日文章到夜郎

四十年中服遠夷馬前羅拜使臣時諸生誰是今  
何武遣誦中和樂職詩

程番西去入牂牁風土江山孰較多應記舊時香  
案吏三年留得竹枝歌西厓丙子  
出使黔中

和令詒十月四日 乾清門引 見

甲夜趨嚴刻漏長 天門藥樹鎖寒光百官進退  
才三日唐宰相故事入相  
三日後進退百官兩賦迴翔已五霜唐國  
史補

云戶部  
分兩賦 玉殿齊班書上考 丹墀布席問戎行

時試武進士  
於太和殿前 何當仲舉分餘論曾識當年老范

滂次日荷澤州相  
國陳公論薦



和令詔十月七日 召入 乾清門 御試  
 日射蕭屏午景移 玉階起草敢論思 書生誰定  
 盧循策前席 慚無賈誼詞 東郡流民悲水國 南方  
 老將宿舟師 是日積貯策二道 試海寇 紅燈執戟諸郎擁 爭  
 看中書落筆時

冰魚

霜鬢雪鬣趁殘年 恰稱銀盤入饌鮮 味並桃花流  
 水美 張志和詞 桃花流 水鰕魚肥 影隨脩竹小園傳 庾信小園賦 一寸二  
寸之魚三竿 兩竿之竹 漫疑白小還論斗 豈比吳餘不取錢 徐陵與王僧辨書 同冰魚  
 獨有江南徐孝穆 殘生相對絕相憐

絕之不

鐵脚

蕭颯金風塞草蕪 蒜頭椒目戲枋榆 未登晉代桃  
 蟲賦 好上宣和稻雀圖 豈有竊脂同素質 不須彈  
 肉費明珠 相看斥鷃蓬蒿笑 得共扶搖萬里無

題夏重初白菴圖

人間萬事如白髮 百年閱盡終枯槁 蕭蕭鶴鬢亦  
 風流 道人不用黃精掃 查田居士厭行旅 青山誓  
 共蓬蒿老 萬里歸來初白菴 花竹圖書事幽討 只  
 思彌勒與同龕 不信浮生有熱惱 縱饒公道三千



丈賤貴何煩掛懷抱但恐星星媚側室阿翁擲鐻  
 當絕倒何意流傳子虛賦相如為客知名早公卿  
 犯嚴出薦口殿中 召視承明草啗以棗脯置華  
 屋龍馬安能脫櫪阜誅茅舊約不得踐空使歡華  
 笑肥腦曉夢官梅催白頭故鄉尚有湖山好

恒山冬夜不寐以二詩見示輒用韻和之聊  
 廣其意

浪說蚊蚋境亦虛寒衾料峭自濛濛風聲偏聚三  
 冬夜酒力全銷萬事餘老去漸憂曹子髮卧來誰  
 得宋王車華胥有路非難到試讀人間長柳書

誰是非非無想天亡羊臧穀總茫然共憐甲子如  
 過客漫守庚申欲學仙十載揚州名尚在數峰江  
 上句誰傳酪奴我亦長為祟不咎前非只醉眠金劉  
勳不寐詩酪奴作祟攪秋眠追咎前非四十年

癸未除夕

生涯爛醉餞流年已到飛騰暮景邊萬事人間無  
 惡夢一家宿世有前緣因緣經云千佛過去世時種何功德常生一處同共  
 一愁中那覓還童藥囊底誰餘使鬼錢獨怪兒童  
 喧櫪馬五更催上九重天

次韻西厓正月二日遊憫忠寺過潛夫別墅



西齋集 卷之八  
天寒古寺靜無沙喜見兒童采蓼芽  
慧業何年始聞道幽居到處每思家  
入門曾識新移竹過客還嘗舊賜茶  
寄語風流湯給事不妨詩酒送生涯

送徐去矜知永康州

天子大開都護府爨蠻萬國皆臣虜  
銅虎新符五寨兵將軍雪夜提桴鼓  
湖南昨獻捷書來椎髻干夫頭繫組  
白崖開置羈縻州金甲長銷謝典午  
是時殿上策賢良文武英姿頌明主  
三十九人金馬門忽降天書落南土  
浮動山前海氣昏煙非煙兮雨非雨  
龍編朱戟火餘蠻歡笑馬前爭負

弩萬里驚傳賢使君清風已掃黃梅蠱  
平生竒絕是茲遊王事何須歎靡盬  
監天心原不別要荒要使南交留召杜  
聖朝文士安四夷銅柱功名何足數

重送一首

西捲音權北帶漢山川人到南荒別一天  
臣節自能輕萬里君恩原只許三年  
黃支有市通蠻貨青草無情起瘴煙  
莫羨諸公臺閣貴春風載石待君還

正月十一日查夏重蔣揚孫二翰林侍直



西齋集 卷之八 五  
暢春苑枉顧宣武寓居輒贈四首

元會千門放仗遲  
早傳宣室賦新詩  
誰當次仲居重席  
猶喜相如並一時  
大府同牢常賜食  
中官過馬每教騎  
東風閣道芙蓉苑  
天上頻催載筆隨

絕塞 金輿避暑還翠微  
宮殿夏雲間行殘北道

千屯月吟盡西蕃  
萬部山射鹿草中紅  
旆動釣魚

花下碧流閒  
六軍罷獵歸  
牙帳爭看蛾眉第一班

癸未五月二翰林侍從口外有詩紀事

玉鏡山泉四面通  
小東門外又春風  
賜書每共

新元宰

澤州相國

作賦還同老侍中

楊玉符編修

天筆遠

搖煙際翠宮袍偏近日邊紅  
遙知小語傳柑夜盡

獻歌詞頌歲豐

似酒殘年不可追  
羊求踪跡惜差池  
文章當代論

才子

謂夏重

翰墨前身是畫師

謂揚孫

萬卷已看窺秘

閣數篇空復詠  
曹司何時下直携  
詩本報我蕭齋

風月知

花朝同令詒  
寅谷蕉飲詠西厓  
齋中梅花水

仙二首

一樹空山雪三間老屋塵  
故人皆久客此日獨知



春絕代詩難詠誰家畫入神何如林處士相對卧湖濱

滄海難為水凌波即是仙數枝當畫障十日養山泉名出離騷後香爭兄弟前西湖有遺廟終借老坡傳

二月十三日 賜朝鮮安南二國鞍馬銀帛

於午門外余與子文曹長見其二國使臣畫

地作詩因命小吏授紙筆令書詩亦清雋可

喜歸次其韻

中朝聲教似風驅四海車書本不殊箕子八條傳

內部越裳三象出天符

安南有天符海門

柳城文物餘冠

履花步山川入版圖借問碧瀾亭下客官名還號

大加無

後漢書注古鄒大加高麗掌賓客之官如今之鴻臚問其二國使臣皆鴻臚官也

附安南鴻臚卿何宗穆贈朝鮮使臣詩

周原萬里共馳驅纔立談間志意殊道理淵源

攸一揆衣冠禮樂却同符畏天各謹侯朝度任

土同歸王會圖流水高山琴載鼓知音世有子

期無

戲代朝鮮使臣答安南贈詩仍用原韻

小邦忠孝效前驅一體唐裝言語殊萬里市書無



西齋集 卷之八  
七  
舊禁三邊欵塞有新符紫門曾就簾前試宋史朝  
坐紫門小殿試貢士謂之簾前重試  
今使臣自礪山君而下皆朝鮮進士茅徑驚看徼  
外圖六十年來太平日日南應道烈風無

西齋集卷第八終

西齋集卷第九

詩七十九首

甲申三月至乙酉五月官給事中作

和令詒三月一日得 旨銓注諫職

黃紙封題出 禁門東風携手拜 新恩窮魚已  
分投枯肆病鶴何緣得敝軒郝氏一枝應自媿王  
家七葉敢同論獨憐壯志非當日猶許清時作正  
言

次韻西厓留題王敏行取園

黃閣東偏竹木幽主人醉客只髡留風神獨許追  
中令官闕還應號小秋唐人稱吏部郎為小天禮部郎為小儀敏行官刑部



故曲水欲題三日宴蘭庭惟待一觴流送君盡室  
江西去持被何須語不休時方有江西僉事之命

初入諫院呈諸垣長

玉階清切尚春寒倚柱人稀唱漏殘一夢天涯仍  
異客十年門下始同官漫思魚鳥歸山晚獨少金

貂換酒難為約平生輕仕進王郎當作侍中看南史

王峻與謝覽約官至侍中不復謀仕進

石門少宰兄宅同宗人聚飲相與縱論吳中

山水余因極道洞庭西山風物之美投老思

歸慨然神往明日率成一篇邀少宰同作

我自田間來不歸忽十年故山猶在眼清夜常茫

然人生取將相事業圖凌煙功成買田宅子孫知

誰賢丈夫困微祿窮老難安眠官卑不肯歸枉計

山資錢官高不易歸何止羞無田三吳江湖窟萬

頃清波連具區一明鏡千古浮長天中有兩點山

水上生青蓮白雲倏來往剛氣相連綿西山更絕

秀林屋幽虛傳九微志云林屋為第九洞天曰左神幽虛之天靈威啓石

室天后乘飛輶白芝不世出寂莫餘隱泉更聞通

五嶽百尺蛟龍淵東窗櫓聲下便闕湖光前草木

盡太古所至疑神仙山中亦何有結屋蒼崖邊長



松自落落翠竹惟娟娟梅籬五尺短橘實千奴駢  
溪翁不識字一飽萬慮捐吾生亦老矣安得長終  
焉借問鼎鼐味何如邱壑專猿鶴遠相弔早寄招  
隱篇拜爵太湖公趣具天隨船全家依水府垂釣  
共擊鮮他時比朱陳淳樸成山川相携歸去來永  
謝塵區緣

酬令詒同省見贈之作

五月中書待 詔餘三人 御筆是親除

脩余靖王素同入諫院時名下贈詩有御筆新除  
三諫官之句余與東發令詒二王給事亦出自  
中旨不誰傳風裁驚華省從此文章入諫書他日  
由銓注

延英容並立同時光德喜連居

唐鄭谷與張補闕  
茂樞連居光德見

雲臺編 碧天十七年前侶兩掖平分奉屬車

時余同  
年六人

和恒山贈履上人

曾識吳中老宿顏東來為我說無還已空白髮三

千丈不住清風五百間茅屋詩如孤鶴遠竹房心

似野雲閒十年夢覺南華寺踏遍梅花風雨山人

久游  
嶺外

諫院獨坐

青門眉格已殘春八尺蒼然突兀身潘令久知雙



鬢改杜陵自分一生貧不慙癡鈍為新進猶喜提  
携有故人騎馬鷄栖竟何事滿箱月紙已埃塵唐拾

遺官月給諫紙二百張見樂天集

送劉戶部禹峰出守真定二首

湖海重來興未孤玄都零落舊遊無劉郎風月多  
遺恨追寫桃花千樹圖君居戶部時顏其室曰又來館

天地遽廬夢豈真伯倫落拓醉中身風流太守誰  
相識元是高陽市上人

四月八日和西厓

前身占夢本浮屠四十蹉跎見白鬚清夢長時到

蔬筍幽期何日飲醍醐思投洛社吟遺句卧想廬  
山看舊圖老去慚余方學道宗雷誰許附門徒

四月九日雨中侍直

春水平階上 殿時滿衣花露放 朝遲但聞湯

禱宜相慶縱笑秦優亦不辭萬國無禾從可望

九重有喜最先知諫書自媿曾何補只詠元和賀

雨詩

送許不棄之官陳留二首

郡國陳留古蕭條風俗衰殘書老父傳蔓草酈生  
祠縣小官齋陋河高春岸危驛亭鳴鴈過歸夢石



林期

石林精舍不棄  
閩中讀書處

許家能畫竹兩世與傳神

尊人友介以  
書畫妙一世揮灑看遺

法風流識後身不堪勞作吏共惜殫詩人十載虛

能事空餘素壁塵

不棄嘗許余作畫數年  
未果相見每以為憾

送張韋存同年出守杭州

兄弟公才世少雙為郎五十典名邦青山郡閣斜

當寺綠柳春城獨枕江南國風光歸竹馬西湖煙

雨落蓬窗此中舊著文章手筆力知君未肯降

寄石泉令朱悔人次夏重韻

孤飛窮鳥影翩翩路入姜家舊涌泉江上竿橋驚

萬丈縣前隴石已千年地無司馬才應盡令有文

翁俗再遷問訊草堂今在否為君吟望向西川

時悔

人以公事  
在成都

次韻令詒贈西厓都諫兼簡師魯

歲月崢嶸未可攀中年相顧惜朱顏何堪名玷揚

劉後

漢揚雄劉向  
並居此職

獨喜交同王貢間甲議螭頭隨

左散斜行燕尾押西班

聽政日六科侍立  
西陞下班如燕尾

歐公門

下今俱老往事重論淚一潛

送子文出守石阡

牢州古郡無人到天遣才人此索居荒服不堪來



擁傳亂山何處可巾車平生總為一官誤垂老輕  
行萬里初流落使君誰愛惜醉中珍重嚇蠻書

道院納涼和夏重

時俞御史扶九同居院中

少城草木足薪蒸山氣荒荒日夕增小閣長臨三  
面水矮牀相對兩窗燈煙迷野渡無人畫雨壓危  
闌盡意凭誰識開元房次律此身本是去來僧

甲申七夕席上限瓜字

略略天風淺淺霞銀河無賴已橫斜人間誰識成  
都石故國愁通博望槎五月間聞吳中大水東省但携青瑣  
月西方誰致玉門瓜近年遣使臣於哈密種瓜進御相思欲夢橫

塘水千里清光不可賒

和令詒晨入諫院

城西王給事袞白有英稱道故憐吳質談經並戴  
憑時真若都諫為工垣長國風名手異朝典舊儒能入夜新

焚草端居每夙興

晚出右掖和同省諸公韻

鵲立長連記注班寸心垂老任堅頑朝無闕事文  
書靜袖有新詩歲月閒一色鴉飛天上樹萬家煙  
隔馬前山相期下直琴尊在道直何妨任往還  
七月二十六日同詠燭得真字



西窗夜話每相親  
燼後蘭膏好自珍  
王氏風流誰作鳳  
石家豪貴枉為薪  
老憐珠翠終無分  
狂看梟盧總未真  
寄語秋風休見跋  
百年長照夜遊人

重表姪支彤九夜過老樹軒與恒山感歎舊

遊賓客都已散去惟恒山獨存次韻二首

長看國手送歸鴻

恒山善琴

豪氣逢君鍊到空  
車馬不

來秋雨後名聲猶在故人中  
造門久歎無文舉  
驚

座惟愁揖孟公  
祇有感恩殘老淚  
平生煙雨荷元

功

是夕與彤九話東海遺事

旗鼓詩壇已仆時  
年來自愧不能師  
座中苦厭聞

常語世上誰能解  
曼辭已見終童投  
漢傳更看德祖託  
陳思相從細數閑  
風月只有淒涼草木知

陶母歌二絕句示駿文柱中兄弟

并引

晉陶侃母湛本傳中止書封鮓截髮二事

遂能成子令名  
鄱陽范逵歎曰非此母不

生此子余獨以為非此子不傳此母也向

使士行官多遺物門有雜賓不將與乾沒

寧馨者同日而譏乎吾友子師本志不終

余固日望駿文兄弟之成立因書此相勉

亦古人箴誨之義也



貧賤能傳賢母名魚梁小吏莫相輕可知縱有尋  
陽鮓不是遺來鄭國羹

賣髮鄰家有饌兼閉門剉薦手霜鑱若教士行無  
佳客風雪誰留范孝廉

和令詒省中聞鵲聲有感

碧雲雙闕影魏峩消息偏傳到諫坡仙樹有枝容  
獨立閒門無客漫相過占風方朔空聊爾見月曹  
瞞可奈何寄語崑山留片玉莫將輕抵向天河

十月二十八日

召翰林院編修

臣奕清禮

科給事中

臣銓同

臣暲

入

暢春苑即事恭

紀

蓬萊宮外叩嚴關秋水虹橋萬象閒未向君前

囊白簡忽從天上寫青山

是日條陳上問臣暲曾

四九章秘奧親聞語

是日座論三角於法

御三絕風流

敢鬪班

與翰林諸君東

豈是前身老摩詰故教名

落畫師間

二十九日再紀

丹霞晨啓

九重關温室從容許宴閒日近

龍

顏疑得水風行虎步動如山論詩每聽尚書履

賜食平參宰相班

京江澤州二相國吉水華亭二尚書同進韻府並在內苑



西齋集 卷之九  
歸去三山繞魂夢分明身在畫圖間

題錢朝采折枝畫四絕句

綠沉玉管埽青紅煙雨從今廢化工彷彿南朝蟬  
雀扇流傳江左得遺風

疎淡清勻影半斜東坡曾與比詩家憑君六幅冰  
綃上寫我新詞上落花

零落將軍畫一厨前朝金粉看疑無何當妙擅湘  
靈手壑倒黃筌沒骨圖

竹石蕭蕭傍水濱夢中商略上林春題名他日驚  
重見應記當時種樹人

癸未二月二日夜余夢人送杏花二株與朝采種於

水邊竹畔繁豔異於常花故末章及之

南郊致齋之夕與西厓都諫同宿道院有作  
三更敲火遶廊行小院時聞古磬聲同惜中年從  
宦學愛尋閑事說歸耕天臨丹闕鐘初動煙鎖瑤  
壇月倍明誰似元和元制誥清詩潛詠萬人驚

奉和澤州相國 賜貂紀 恩之作

千金價重拜名裘政事堂中朔氣收漢代公卿輸  
蘊藉謝家宰相自風流人如冬日爭相愛 恩比  
春溫許獨留慚愧侍中空插帽豐貂犯雪殿西頭  
歲暮省中書事二首



西風鳩鵲拂煙霄人物清華列外朝閑向奏抄徵

掌故唐制給事中掌奏抄今詔每從給傳采風

謠子忝吏兵二垣凡文武馬前直合提雙印六科皆有

行印從殿下猶看衣八貂唐制左散騎與侍中左右

而今則用為常服矣朝罷相逢直學士鳳池初

上九門遙散朝後每與昭德門外內直諸

五更宮箭漏丁丁長指天邊執法星莫媿張衡居

風議當思汲黯在朝廷諸侯不復懸滕綺小吏還

知用竹刑鑠印日吏來判牒用竹刑二字衆寄語

番官傳制早合符須撼禁門鈴舊制省中有公事

出番官亦唐事

十二月二十八日拜賜御書歸行太

和殿西見牆外梅花一枝嫣然獨秀感而有

作二首

殿門西角粉牆中雪裏恩光已不同錯認徐熙

乞新樣先將春色上屏風

口脂面藥漫相誇杜老風流迹已賒誰似親書

春帖子城西偏賜諫臣家

除夕和西厓用少陵飛騰暮景斜為韻五首

西山尚殘雪片雲有時歸寒宵一尊酒俛仰誰是



西齋集 卷之九  
非故鄉三十口嗷嗷歎恒饑江田收薄黍聊以佐  
蕨薇吾廬亦可住十年計偏違惟送關塞雁夕陽  
向南飛

少小好志節火氣期上騰昨拜諫議官舉朝想風  
稜寧知已衰謝虛名難復憑微尚守靜退還恐悔  
吝增殘年索酒券人事殊可憎文史庶銷憂掩卷  
昏妄仍蕭然一榻外四壁餘孤燈妻孥不解事絮  
語同蚊蠅

吾家江上宅流水臨門注松竹料已長鄰里寧如  
故衰親甘旨缺藥餌扶遲暮但願春氣和東牖陽  
光駐後園理荒穢蔬甲拆冰沍携持出茅堂車杖  
兒孫赴獨怪遊子愚一官悔已屢皇皇竟何爲萬  
事生違迂

朱門祀竈餘熒熒燈火炳貧家無黃羊輟釜厨獨  
冷子郭呼不來閉戶畢殘景高齋子城曲寒雲暗  
諸嶺老樹呼北風默坐神密覩勞生且安眠擾擾  
任人境願制學道心毋使六合騁

衛士點漏急庭燎驚宮鴉煙霄聽飛鳴殿閣人無  
譁趨朝入常班鐘鼓方傳撾清蹕一聲出風卷旌  
旗斜趨蹌陪萬騎明燈玉河涯雲罕鹵簿迴曉氣



籠天家還聞 九重上書詔宣黃麻三吳巡狩地  
盛事父老誇時方有南巡之命

正月六日喜雪

祈穀前一夕  
上親書祝版

天題翰墨降齋居已報飄飄雪滿除入地蝗無千  
尺種比門粟有七升餘農家預決豐年喜太史應  
占上歲書歸踏瓊瑶踪跡上先傳好語到吾廬

十六日澤州相國蒙

恩

賜宴私第招集

點翰堂即席屬賦

大官仙饌溢門閭曲宴相呼拜 賜餘黃紙重封  
千釀酒綠江新打百金魚但看元老調羹手不用

門生議食書却笑拾遺無口實春風小摘饜園蔬

西山

太行八百里不斷若門戶連岡走冀北案衍無險  
阻城西抱京室翠色自太古長天淡如畫黛綠修  
眉嫵大山遊神龍小阜卧金虎井陘當臂胛居庸  
搯腰脅陰陰羅諸峰兒孫顧其祖吁嗟四朝跡興  
亡付平楚三百七十寺芳草同仰頰流傳武清侯  
海澱遺別墅喬木十年種異花四方取雙橋架玉  
泉銀練寫飛雨前湖泛方舟葭蘆迷遠渚後湖界  
文石鳧鷖戲寒淑世亂不復問野老識其處夕陽



挺魚叉煙水無人主  
吾君萬幾暇  
遊幸樂斯

土離宮三十六  
屬玉設  
清籞規模茅茨制  
平城

存棟宇肅穆  
澹寧居奏記  
交接武楊柳  
亞周廬

嚴更衛虎旅  
讀書兩高齋  
天作文章府  
苑中有淵鑿  
佩

文二齋為翰墨清宴之所  
湖光上玉儿  
花氣入畫斧  
芙蓉在一

曲墨池雲亂吐  
清溪有新構  
幽絕更何許  
時清溪

書屋初成在東書房之南  
蚰蟻松百尺  
檀欒竹萬部  
馬卿奏詞

賦劉向校亥魯  
供奉賞丹青  
待詔收格五  
車馬小

長安雞犬新豐  
聚外戚起名園  
左右儼弼輔  
野田

捐溝洫別館觀  
禾黍舫艫花間  
歸桔槔煙外  
序春

波棹謳發水嬉  
雜歌舞期門  
學角觝中官  
校弓弩

香草合歡殿  
飛閣不可數  
仙舟集罟網  
小市通商

賈修隄試騶  
馭雕檻調鸚  
鵡九枝剪新  
燈火樹然

蓮炬魚龍忽  
曼延百戲會  
堂廡父老驩  
擊缶公卿

喜賜酺長年  
千秋節報賽  
劇干羽尋檀  
間都

盧考搏煩萬  
鼓盡言太平  
樂天近同鄆  
杜六月吹

炎風流螢團  
扇舉虞人整  
網城龍旆戒  
牧圉峯峩

青山口行殿  
歷八所邊花  
生無名塞鳥  
閑相語

魚溝豐長林  
君王此清暑  
近臣從射獵  
將軍縱

超距烏號連  
鷲鶴韓盧逐  
狐鼠車駕久  
未歸山



光日延佇秋色西白橋峰巒列伍伍水花已零落  
衰柳縈輕緒清冷高粱水行人照來去

次韻夏重下直偶過令詒西亭

二老風流山澤臞槐陰靜處步廉隅懶乘車馬過  
朝士喜寫文章與學徒白髮爲官惟自醉青筇無  
病不須扶知君託命煙波上終乞君王賜鑑湖

閒居雜詠六首和周遽園都諫

小庭無事綠陰時苦竹綠藤課插籬惟有故人過  
飲水閉門風雨夜論詩

臘前春酒雨前茶未有風情抵白家但恐丁香易

零落三更把火更看花

老樹長年伴客身草堂顏色稱家貧公卿莫作三  
槐記惟取清陰似主人

三月江東春浪生故園野水與門平人生何日山  
資足苦說歸田豈不情

低頭作諾與時違萬卷殘篇兩板扉漫學荀郎草  
申鑒旁人終笑諫書稀

牆外春流野艇遲夕陽山色最宜詩叩門何處傳

佳句知是相如第一詞

時夏重居城南道院先有和詩相寄

澤州公扈從南行舟次潞河寄詩留別敬次



來韻

萬點紅旌下海城元臣憂國問蒼生杜陵春水孤  
吟興謝傅青山異代情霖雨十年占稼穡清流九  
曲照冠纓江東野寺題名處好理煙波小艇行

栖飲堂詩四首次西厓韻兼簡夏重

平生一束書閉門手自曝中有故人詩招我歸隱  
速默坐思舊山心與魚鳥逐水竹三十畝百年結  
溪屋家雖致千金倉皇豈能築如何老不悔塵土  
換巖谷即今俛仰間萬事剝未復低頭事冠帶舉  
眼羞林麓今年五城市斗米同炊玉折俎已久虛

藜藿常到目吳語翻半忘漸覺四方熟始知此身  
累周妻與何肉中夜起自呼作書罵童僕勗哉老  
氏言不辱在知足

吾聞妙高義本是迷盧峰天生功德水湧出千芙  
蓉風輪忽東轉七寶紛相從影落浙西寺雪山無  
舊蹤我曾遊十日靈境一再逢至今清夢出猶繞  
澗上松祇應媿湖水恐記當時容君家近靈鷲抱  
舍沙重重養禽答樵唱種竹傳煙鐘遺書山中客  
誅茅敢辭慵待君乞身去幽興羅一胸此時君為  
雲我亦隨如龍但知少游樂不鄙元卿農筋力及



西齋集 卷之九 五  
未衰尺布猶可縫吳江綠瀾渺越花紅蒙茸買鄰  
求精廬萬卷窮三冬談笑愜素尚一酌玻璃濃  
吾輩固文士垂老踐要地置身諫官中獻替天下  
事晨光西陞下八人立如植君強我萎腰不敢稱  
二稗木枕質酒家羣笑陽城醉茲春 車駕出百  
職隨官次君行插貂蟬執筆陪卿寺東歸指鄉縣  
前路識亭隧長安雙槩牙啞軋間笳吹清江無恙  
在春風一帆遂十年夢空谷寔然足音嗣好山如  
雞肋欲食難更置但愁東諸侯摩肩各麋至湖光  
彈指間目瞬不暇視終被煙霞嘲空抱猿鶴媿舉

手謝山靈日暮還七萃

富貴及早歸古人再三云百年若蒼狗斯須變浮  
雲鑑曲如可乞神武謝吾 君詩書教子弟傳家  
有清芬逍遙載尊酒遠勞田間勤時占課雨書閒  
草迎貓文社肉極山味池魚挾溪腥自製隱居服  
不須浣中帟蕭然離州府人事何所聞如彼九臯  
鶴飲露凌紫氛俯視天地間世路徒糾紛念茲良  
歎息麋鹿當呼羣查子吾臭味風格乃一熏百頃  
江上田歸來同耦耘不辭斥鷃笑十步翔枋枌君  
歸聽斯語酌酒中自欣牀頭理藤篋諫草當盡焚



西齋集 卷之九  
報我滄江水綠漲已十分

喜少融弟至京師

入門相見集悲歡肥瘦形容一笑看老悔功名投  
牒晚夢思風雨對牀難家庭久已知名士門戶何  
須寄下官莫學阿兄真薄相十年遊宦尚單寒

賀令詒洗兒歌十首

分題諫紙報交親入手明珠的的新花底散朝無  
一事王家共看小麒麟

天生河嶽付英靈江左風華尚典刑異代文章當  
有種抱來應是識風丁

三人首掉直言旗小諫聲名海內知濃笑東家書

本字作歌誰數杜唐兒

蓮洲都諫字  
之曰本郎

蹉跎官職暮年成六十生兒萬事輕莫學阿爺名  
位老願他年少到公卿

硤硤頭玉見瑤光賀客歌呼笑滿堂盡為仲宣書  
籍喜外家原屬蔡中郎

東歸江水恨無田豈為揚雄老未遷知爾殷勤謝  
賓吏洗兒不用水衡錢

閉門書史伴清娛對鏡星星摘白鬚莫訝海中生  
果晚要將門戶託文殊



才子非熊夢未賒呼兒谷鳥足深嗟天公定為吟  
情苦故遣重生顧況家

啼笑懷中奪阜囊家風生小愛文章門前正對梧  
桐樹好采紅珠結鳳凰

清江花竹接煙墟萬卷家藏舊賜書待汝他年讀  
雌霓老夫歸去築郊居

四月二十三日晚出右安門留宿王文靖公

芍藥花野六首

草橋遊跡好隨意得花村流水欺官道青山赴郭  
門問人循舊路立馬數名園碧樹不知遠但聞雞

犬喧

平泉絲竹地詩酒是前塵清絕三朝樹風流二曲  
人門生餘白髮野老信青春寂莫揚州宴空驚客

淚新

古井何年甃茶香此復同花間雙軸轉柳外萬畦  
通階長有情碧闌開無賴紅不堪留宿處二十徧

芳叢

予自丙寅遊此屈指已二十年矣

四面山風合空堂鳥雀哀黑雲穿徑密白雨過墻  
來燈火重鋪席龍蛇亂入杯天公應有意火急遣

花開

是夕大雷雨



西齋集 卷之九 六  
初日憐生意臨風一笑微漸垂金帶重忽訝玉盤  
肥清露流團扇紅霞上夾衣穠華雖自得終要借  
光輝

草綠迴香廟春陰夢雨祠科頭從步屨洗眼好題

詩碧霞夫人祠田父勤千畝閑人把一枝寄聲劉

侍御驄馬去何遲西谷次日於道左相遇

振西姪至話舊二首

遠來重話竹林眠京洛論文慰眼前猶識舊聲憐  
去日尚餘豪氣數當年才遲時命慚吾老家復公  
侯賴汝賢別夢相招疎懶叔桂叢長負小山篇

獨抱遺經卧海濱百僚衆口誦清新誰能世並家  
門集莫歎朝無強近親諸到才名歸後進二疏風  
節擬閑人詞場好試穿揚手萬卷文章定有神

對鏡

憔悴忽如此清光奈爾何老將壯心去閒覺道根  
多落拓一官在悲涼萬事過杜陵殊未達勲業恨  
蹉跎



西齋集卷第九終

西齋集卷第十

詩五十九首

乙酉五月至丙戌三月留京師作

一官

一官放廢合疎頑不計君平身世間三宿本無他  
日戀半生猶得退居閒布帆欲下從秋水清夢先  
歸報故山祇有恩門風義在合歡花謝未東還

五月二十日寓止夢綠草堂諸君携酒過慰  
即用夢綠二字分賦二首

我笑班孟堅著書重三夢詆祥不由人造物或愚  
弄前年脫手板殿下陪法從黽池始奮翼密勿事



西齋集 卷之十  
諫諷寧知故人書汎濫法家訟波濤忽揚沸雷霆  
增震恐通侯案三府平署混喧闕八口正啼饑晨  
炊斷官俸小兒拾諫紙大兒廢雜誦暮投陳君榻  
濁醪倒鳴甕頗抱學道心投石不知痛碌碌何氣  
炎世豈忘無用雖乏良田宅願學仲長統知已酒  
數杯榮比傾朝送

江東荻葦村家在江一曲妻孥報書來風雨頽破  
屋清流舊溪水抱舍千章木此歸亦偶然投老計  
早熟人間得喪空糾纏齊禍福長年慚仗馬轅下  
效局趣從茲免謗譏枯槁自甘足僮奴頓失志相

視或舉哭深咎諫書釁歸怨御史獄主人誤射策  
辭連竟莫贖始知據職好若輩爲梁肉我醉耳不  
聞談笑薄官族士日下西掖帶急寬腰腹徘徊起  
長吟愛此小庭綠

送王雲衢之官新津

小縣名偏古西川官最幽遠山裴迪寺春水杜公  
樓花柳應神助琴書且滯留莫吟秋葉句江檻足  
離憂

七月二日有感二首

解印閒居日晏如五升不盜太倉餘東西還汎河



西齋集 卷之十一  
中木物我真同濠上魚田舍當官翻漸狹賓寮無  
病也教疎永興偶奏劉君策慚媿張成弟子書  
先生拂袖賦歸來何事觚棱夢却回朝市不宜身  
再隱丹青偏與老相催李陵已歎無生氣田甲馬  
知有死灰延閣諸公高議在摩挲萬卷眼初開

自嘲二首用前韻

憂患年來自笑頑此生常在吉凶間五窮故鬼終  
難遣三黜微名未許閒誰道孔融輕去國空思賀  
監乞歸山兩京百口如絲命日指征帆望我還  
道心匪石却同頑顛倒先生虎鼠間賈傳負才還

俟罪何公任遇敢投閒枯魚無用偏懸肆小草多  
情不在山淒寂可憐青瑣客早朝曾點末班還

次和西厓送別令詒二首

報 主功名薄全生憂患餘李膺惟直道潘岳且  
閒居黃口依中婦青箱託小胥傷心趨走地猶有  
未焚書

湖海無家客蒼茫問故園羣鳥驚並散一鷄獨孤  
騫垂白求生理窮愁著法言中流常失劍莫視刻  
舟痕

西厓復用前韻見貽酬答二首



生死論心友差池諫諍餘迂疎才共濟清要地難  
居別緒憐蘇李離憂感屈胥多君中發憤爲草絕  
交書

掖垣花影散寂寞似文園不道棲鸞列還容病鶴  
騫王維餘宿習劉向校羣言長誦青蠅句空留白  
壁痕

謝澤州相國贈馬

曾向長楊侍 至尊滿身猶散五花痕霜蹄獨立  
心應老龍性難馴骨尚存豈得養來如故主不知  
騎出向誰門繞朝若贈西風策伯樂終酬一顧恩

哭野航

平生難斷轉茫然身後文章定孰傳五絕才名悲  
作達一門家世本無年半人獨得詩人病新鬼翻  
爲路鬼緣海內知音君已失此身將老更誰憐

題澤州公河上集後五首

淮南續續海雲生入眼桑麻見太平盡說相公提  
造化喜聞父老頌河清

草樹荒宮老眼看六朝殘夢好煙巒長思沈范芙  
蕖賞江左風流薄謝安

財賦東南數郡雄白頭詩筆補天工誰將辛苦盤



中甸傳寫三吳繼國風

公寄宋中丞詩極論東吳財賦之苦

坐來天上與春還畫舫青簾萬卷閑踏遍南朝煙雨寺白公遺閣陸機山

午涯清夢十年新真作江東釣艇身極目玉溪流

水曲中條山色老詩人

公數三晉詩人獨眷懷天章屢有篇什而天章惜已

矣物逝

### 滄浪亭歌用歐陽公韻寄宋中丞

吳中故人招我隱西風已草歸來篇何為罷官翻不歸海山兜率皆茫然秋聲滿地非吾土仰看缺月如刀環寒燈開卷古人在江湖舊夢爭餘妍十

年別我南禪寺晨鐘覺後憎塵喧門前流水在何處但望故國空蒼煙蘇君自是洛陽客棲遲偏得吳山緣人間放逐亦不惡扁舟獨往追神仙我愁歲路將白首風月豈得長無邊三吳流傳足春水寒潮影沒城東田滄浪小亭忽如舊紅菱白藕交清漣謝公遊遨有幽意一笑時乞山僧錢長安貧病老給事不材已棄人還憐憂患依稀似子美平生出處終由天倦鳥當知返幽谷縱魚未許逃深淵吾生有命獨涼薄輸與野老煙波眠白雲在天不可見南園水竹愁年年新詩終恐猿鶴笑煩公



莫向山靈傳

聖安寺觀蔣樹存繡谷圖題四絕句

蕭寺無人到齋鐘出遠林前生業白客來往得初心

靜看茅屋趣茶罷欲題詩廢殿何年樹垂陰覆古碑

小閣水精域斜陽淡欲無呼童拂殘硯留客看新圖

家在桃花曲人棲祇樹中故山修竹影清夢落西風

下直後簡兩殿諸公二首

高齋諸學士典校日華西宿學人爭許遺書家並携永明傳舊體秘閣奏新題自歎周顥老宮商半已迷

天上清涼地 行宮六月寒感 恩初 賜扇飽

食共傳餐 扇 上於行宮 賜編校諸臣 御書 詩筆從教采圖經

借與看周廬嚴出入不問寫書官

八月十二夜憶家有作

草堂伏枕夢初殘庭樹西風小作寒已覺安心無別藥不知送老是何官萬金間阻恩書遠八口倉



皇活計難自笑三塗終有累楞嚴案上嬾重看

題宋翰林山言學詩圖二首

骨骼飛騰三十餘眼看公相府中居韓家應笑符  
郎嬾秋雨城南始讀書

秘室從容錄奏時共驚談笑却熊羆文章曹志波  
瀾舊袖手休輕將種詩

與西谷

白公四十四遠貶江州吏水上聞琵琶始有遷謫  
意蘇公四十四責授黃州使婦女罵焚書長幼皆  
發悻嗟哉兩天人瓌瑋生間氣立朝尚大節得失

賤名位遭時非不達方正或倒植寧乏當途憐才  
高道所忌兩州落楚國千古離憂地屈賈齊一悲  
倉卒罹文致平生出處似踪跡猶可記何爲同歲  
月造化亦遊戲始知萬物數禍福不能避吾曹遇  
聖明白筆列近侍東省職五諫西臺掌三刺黽  
勉懼曠官罔敢靳勞勩偶然軒輊間年與二公類  
才小慚昔賢文章邈難嗣相顧各自笑駑馬解兩  
鞮老瘦頭未斑憔悴增餘媿深灾長默責惟輕自  
天賜讀書勿永歎得酒且一醉

乙酉九月十五日 上從 行宮避暑回 臣



曠同武英翰林諸臣迎拜於新屯道左放斥  
餘生自分長離 法從猥蒙 異數再覩

天顏因念自立 朝以來首尾八載感陳迹  
叙 新恩得詩凡十有二首謹於二十日伏

暢春苑小東門外恭 上

瀚海西風萬里清百蠻歡送過興平花間屢宿秋

山殿天外新歸細柳營 賦就金蓮傳競寫上於行宮

製金蓮花賦進來龍馬看先行孤臣亦是蓬萊客夢逐

紅旌似再生

昔陪朝謁建章宮名玷尚書牋奏中九賦版圖忘

帝力三農雨露出 天工遇非顏駟功名老官

比王筠品秩同曾拜驪珠萬金 賜至今懷袖拂

春風官戶部日蒙恩召入御書唐詩

紅雲影護紫薇天鳥雀呆愚語曉煙班列長隨華

省後姓名首達 御牀前垂衣遇 主真千載書

笏為郎已七年忽奉 九重親下問殊榮萬口已

爭傳記癸未十月四日召入見事

殿下書生橐筆時 臨軒清問閭閻私甲科曾踐

登朝跡乙奏還陳射策辭一戰久慙無壯志萬言

初上得深知小山風雨留叢桂上苑偏栽第一枝



十月七日 乾清門 召試蒙 恩 拔置第一首 陳社倉遺法 隨見施行

三公啓事聽銅龍 御筆親題出禁中 甲申三月二十日

特旨授吏 科給事中 諫府囊携霜簡白 近臣班接畫簾紅 朝

衣不散金爐氣 歸騎長依水殿風 祇有感 恩遲

退食 天書夕拜掖門東

玉階趨走並宮僚 披拂清風上慶霄 碧落雙携供

奉筆青門兩插侍 中貂 十月二十日 轉掌兵垣 百身豈足酬

恩遇一字無能補 聖朝深負邱山猶未報 洪

爐終自荷甄陶

碧戶紅簾曲水間 連朝簪筆侍 龍顏爭圖温室

千章樹分寫甘泉 四面山占數從容 天語近論

詩清燕侍臣閑 玉京粉本誰能畫 花外 金輿日

暮還 記十月二十八日蒙 召入 暢春苑事

劍佩千官列 玉除牙籤廿卷拜 恩初共看天

上新垂象不數人 間舊賜書風雅重 經 聖人手

光華偏照小臣廬 從今載詠南風句 應道文章未

得如 是日 頒賜在廷諸臣 御製文集各一表

秘閣無塵翰墨親 雲煙落紙盡如神 宮中預賜千

門喜闕下先分兩掖春 當戶懸時龍勢動 自天

題處墨痕新城西 萬丈榮光在傳作 臣家百世珍



十二月二十八日 隆宗  
門復拜 御書春聯之賜

夢繞 君門別諫坡忽傳 天意轉陽和三褫敢

望還鞦帶一面先教解網羅金碧仍來瞻氣象丹

青猶許寫 恩波舊臣恐懼頻流涕惟感矜全

聖澤多 乙酉五月二十日 落職六月二  
十一日復奉 恩命留京效力

縹緗插架擁蘭臺親見燃藜典校來江左四聲經

籍采元和十道驛程開 七月一日入直 武英殿  
時翰林諸臣方編校佩文

韻府方輿路  
程考略二書 皇天亦自收微物 明主何曾棄不

材遙仰 行宮勤乙覽日邊常捧 詔書回

官途舐觸語相連散質終歸造化權僵燕一生疑

入地枯槎八月更浮天青雲有路餘生在白壁無

辜 聖主憐從此向榮同草木只應長詠太平年

寒孟和澤州公出城感懷韻

四十無成骯髒人年來已歎白鬚頻地偏蕭寺長

宜夜天惜寒林欲放春忠信祇憑 明主舊衰遲

始覺世緣新元臣匡濟蒼生了猶見詩成泣鬼神

甲申十月曾蒙 恩 召入 暢春苑東書

房有即事紀 恩之作休官後已分絕跡今

十月二十日復 中旨被召悲感舊事追用

前韻



夢覺重來謁 帝關綺疏如舊瑣窗閒筠籠蒸出

臨池字 時以竹籠蒸 御書西岳廟碑 裱工云火焙後 翰墨千年不落 蠻布楷成

著色山 王麓臺學士論 布楷山水法 畫省掃空供奉跡碧霄添

註謫仙班 清溪六曲屏風影都在孤臣涕淚間

是日 命畫 清 溪書屋屏風

冬夜寓宿僧寺與麓臺學士夜話

彌勒龕邊佛火明小窗時見墨縱橫山歸老手千

重翠月近閒人十倍清吳質病羸悲昔夢王維詩

畫本前生論文夜半茶煙細卧聽松風萬壑聲

題顧南原所畫東坡像

東坡老人飽憂患萬里無家天所泰與時牴牾晚

乃悔南蠻婦女皆譏訕吾生後公五百年手把殘

篇自童丱夜長清夢或見之彷彿鬚眉相識慣酒

醒月落不可追默向文章別真贋古帖流傳笠屐

圖風雨單衣露兩骭枕榔菴外負瓢歸田野行歌

忘日晏顧生胸中有詩筆畫工俗氣能鋤剗 蔣君 樹存

從古帖中得魏了翁所傳蘇學士像令俗工摹之 頗失其真南原工山水不解人物乃以意寫之觀

者無不 嘆異 心以公詩寫公貌几案俄然枉清吟焚香

再拜掛著壁典刑具在疑非幻自恨不如黎子雲

載酒堂成意無間對公朝夕願低頭自此浮名薄



西齋集 卷之十一 十一  
遊宦不須更畫樂天真我欲從之具羔雁

陳潛齋學士席上詠菜

嘉蔬小摘舊名存一把長蒙地主恩惡草同生疑  
掩色寒風相壑未傷根微時宰相曾投寺老去英  
雄學閉門獨歎人間爭食肉山中滋味與誰論

送陳秋田之官荔浦

柳郎才調寄冥搜

秋田工詩餘故以耆卿為比

佳吏忽忽更遠

遊長手百篇藏秘篋新添三口入行舟

樂天詩身兼妻子都

三口秋田近有選郎之喜故云天圍海氣通山穴人和猿聲上驛

樓誰唱長江歌一曲相思水送入昭州

長江颶蜚戶所歌見

唐子西集桂林有相思水見唐書地理志

春旱

上帝惜靈雨三月多恒暘下土萬物盛白日無潛

藏太史上月歷憂將及農桑 天子責羣陰露坐

齋東廂下 詔求直言厥災訪京房公卿盡龍警慄

羣議集朝堂生魚享共工水日祠太常聚蛇小壇

下燒豬邑門旁 帝曰吁龍乎何為火所傷天聽

不夢夢萬民失陰陽枯骨本無用愚婦詎可禳三

公毋策免六事予未臧十日輟寢食至誠默相將

是時 萬歲節密雲布水祥西山送急雨草木昏



西齋集 卷之十一  
三  
微茫池中五蝦蟇煙霧籠商羊早魃不急去後者  
當為糧四郊盡歡喜田歌樂相望始知 聖人力  
乃使天工忘屏居事舊史臨階喜微涼一庭閑花  
草佳氣鬱蒼蒼誰作里人頌庶以歌年康

霖霖二首和龔叔度

花下春衣濕自知身輕偏與病相宜久無神馬煩  
占夢誰道名山是國醫漢室賈生應試數周家仍  
叔欲陳詩不因 天子開三府難使陰陽萬物滋  
樓臺雲氣滿蒼冥父老呼雩盡衣青杵白半沾看  
尚暴蛟龍小鬪喜初醒誰家春竈供常祭何處天

船過客星從此郊原催布穀不妨顧兔笑無靈

題家藏二草堂畫

王叔明黃鶴草堂

香光居士山中客自寫吳興山色殊野竹開時問  
蕭寺水田缺處見明湖董家筆法今能否趙氏風  
流酷似無壁上名山日相對不須還作向平圖

董思白盧鴻草堂

林泉掃跡豈前塵每有西風歎隱淪老去雲煙空  
見畫近來巖穴且無人介推不解言微祿王霸終  
當乞病身誰似東歸盧諫議太平長放作山臣

盧鴻



自稱山臣  
見舊唐書

松花石硯歌

天公北鑿長白山巨靈乘風過青海斧柯一夜斲  
 山骨寒玉如天色不改松花江影綠于竹鴨頭  
 唼唼生光采江耶石耶不可知但見玉堂匣底蛟龍  
 在明光宮中無纖塵興搖五岳石有神九門洞開  
 天祿閣分賜視草金坡臣相如子雲著詞賦小窗  
 弄筆不可嗔何為芭蕉夜半潑寒雨秀色亦到支  
 離人鍾王鮑謝吾何有天上煙雲今落手歸來拂  
 拭置几案春波一曲疑可取臨川新樣輸匠巧洮

河舊石慙形醜平生未能識竒字敢謂立言期不  
 朽綠章箋天天不語豈有氣象干牛斗真靈自笑  
 作頑仙何物鬼神為我守

贈書局三同舍戲用東坡體三首

顧南原

顧郎游好十年遲卑濕相看盡老時洛下何人能  
 贈婦吳中無客可稱師蔡邕避怨于吳顧雍古賢  
 畫壁看都絕小字升堂更不疑江上布帆雖借與  
 諸侯東去欲干誰

蔣樹存



藏書萬卷校讐新庾信文章賞更真學士一門終

有筆野翁三徑不無人看花漫說溪山主東坡和

詩云瓊林花草聞前占夢當為社稷臣獨歎吳兢語菴畫溪山指後期

良史絕外家窮老敢論親唐書蔣又外祖吳兢又

書

徐亮直

風流城北舊多情好事傳看劇韻成共說南州見

高士却驚西省得書生人中騏驎應無價天上麒麟

定有名未必箕山遂君志公侯我已識徐卿

酬子文洞庭湖見寄二首

水驛微冥九月天孤燈風雨洞庭船清吟若過宜

春口悔不歸耕十畝田

柳家子弟厭家雞起草南宮夢已迷況是中年衰

樂後更無書報庾安西

西齋集卷第十終



西齋集後序

吾友吳君獻可奉其先公給諫西齋集十卷來告曰霧不肖不天四歲而孤不及逮事先君子雖上有三兄不幸仲叔皆蚤世伯氏一官蹭蹬再起再躓以是門戶益衰諸事失墜而墓中之銘闕焉今茲有事於遺詩竊欲附記先君子一生行迹於後以垂家乘而傳子孫敢以屬子余不獲辭謹按吳氏之先始自河南固始望爲渤海與延陵異族元末遠祖遷蘇之崑山傳至儀部大參典客三世仕宦族以滋大典客仲子號竹臺者贅於琅玕王氏



遂留居太倉即給諫之曾王父也子約叟公是生梅村先生崇禎辛未會元登鼎甲為海內文宗鼎革後以親老出就徵居二年歸康熙壬寅始生給諫公幼穎異讀書過目不忘乙丑拔貢同選者何此瞻劉大山王雲衢輩多知名士而給諫哀然居首丁卯舉京兆戊辰成進士從東海司寇編校皇輿紀程未成中輟久之除戶部廣東司主事旋升員外郎甲申特授吏科給事中轉掌兵垣次年以會劾銓司陳某婪贓既訊得實而陳誣以挾嫌列奏坐免官蒙恩留武英殿修書將復用

丁內艱歸哀毀以卒年四十有六公秉承家學讀破萬卷為人樂易以友朋為性命自乙亥入都需次三年官戶曹六年居諫垣年餘校書一年凡四方造謁者無不倒屣延接倨直之暇把酒論文歡洽竟日士有一藝之長極口稱譽用是戶外之屨常滿月俸不足舉息至萬不惜也其好客愛才出於性生如此使天假之年得行其志豈特以詩著哉獻可為給諫少子行四原名彥道後改名霖既幼失怙析產得瘠田六十畝獨隨食生母年甫十四而生母又亡轉徙流離能刻苦自勵以累不得



志於有司也去而爲客積束脩之所入以葺祭酒  
之賁園築西山之丙舍將欲舉百廢而具治之然  
輒限於力而志不墮今又開雕給諫公之遺詩并  
附述其事迹冀傳於後揆獻可之心蓋無一日偶  
忘其親也余故備論之以成其志後有爲公撰誌  
銘者盍即於斯文徵之至公之詩之必傳於世澤  
州相國已具言之矣茲不贅乾隆辛卯中秋雲間  
後學沈大成述





